

Ndəshigu Sara Wu Tsa Yahwana

Ndər Sha Aga Ndapi

¹ Kadivira Hyal dzəguya duniya ndər a'yi, ndər kə ənga Hyal nga ja, ənga tsu ndər kə Hyal ngau.

² A'yi ja ənga Hyal kadivira ja dzəguya duniya.

³ Lagu nyi ngə Hyal məliya sə patəu, ma a'yi ənga ja mai, sə a'yi kəra Hyal məliya wu səra ji məlna mai.

⁴ Wu ja ngə pi, najaka pi tsu ca ngə mbəmbəl nə nji.

⁵ Mbəmbəla nyi a vər mbəl wu kuthləu, ama kuthla nyi a'yi a sən ciya mbəmbəla nyi mai.

⁶ Vanyi ndə a'yi kəra Hyal səwa, thləmə nyi ca ngə Yahwana.

⁷ Ji shili ar viya sakida ar kəra mbəmbəl kau, aga patər nju nda mbərsa ənga ja lagu nyi.

⁸ Naja ənga kənyi ngə mbəmbəl kə mai, ama ji shili ar viya sakida ar kəra mbəmbəla nyi.

⁹ Mbəmbəl kəra jiri, kəra wu nə nyi mbəmbəlkur anə kalar ndə a vər shili wu duniya.

¹⁰ Ji shili wu duniya kəra naja ngə məliya ənga kənyi, ama alaga abangau, njir duniya a'yi sənbiya nyi mai.

¹¹ Ji shili aga 'yi'yi kəra nə nyi, ama nji nyi a'yi dləwuri nyi mai.

¹² Ama anə patər njira dləwuri nyi, njira mbərsa ənga thləmə nyi, anə ndar ja dənama nə də wazha Hyal.

13 A'yi wazha yaya wu ndəkur mai, alaga lagur cim nə ndəkur mai, ənga alaga lagur dənga nə salkur mai, ama yaya sara ara Hyal.

14 Ndər kau, ba ji də ndapi, ba ji nggya wu pama mən. Na'ya tsu lari kadakadarkur nyi, kadakadarkur nə Zər Zəmə pathlə sara ara Tada, kəra nyinyau ənga mayiwakur ba ənga jirkur.

15 Yahwana ngə lər sakida ar kəra ja, ji hya'ana dəhəu, ji na, “Naja kə ngə ndəra yi ndər ar kəra ja ar pəci kəra yi na, ‘Ndəra wu shili wu yukudə də, naja ndiya də, ara a'yi ja kadivira nji ya də.’ ”

16 Sara wu nyinyikur nə mayiwakur nyi nga mən uya barka, ju lə mayiwakur nyi ar kər ar kər.

17 Arya dladə shili lagu tsa Musa, ama mayiwakur ənga jirkur shili lagu Yesu Kərsiti.

18 Ndə a'yi kəra saya fər li ar Hyal mai, ama kəl Zər Hyal Zəmə pathləu, kəra a vər nggya ənga Tada, a cabiya mənər ja Hyal.

Sakida Nə Yahwana Ndər Məl Babətizəma

(Matiwu 3:1-12; Markusu 1:1-8; Luka 3:1-18)

19 Kəja sakida kəra Yahwana ləri ar pəci kəra njira nggurəm nə Yahudiya sara wu Urshalima səwa pubu'yar ənga njir Lawi aga nda yiwabiya tara wa nga ja.

20 Naji nggəl ara nar nda jiri mai, ama ji nana ar babal abər, “Nayi ngə Kərsiti mai.”

21 Kə ndə yiwa nyi ndə na, “Ya, wa nga ga? Nagə ngə Iliya ya?”

Kə ji shadəwa nda, ji na, “Awau, nayi ngə mai.”

Əngwar nda, “Ya, nagə ngə nabiya nyi ya?”

Kə ji shadəwa, “Awau.”

²² Ayukudā nyi patəu, kə ndə na, “Wa nga ga? Nar 'ya səra 'ya sha 'ya nda nar nyi anə njira səwa 'ya. Mi nga gu na ar kəra kər nga?”

²³ Kə Yahwana shadəwa nda lagu ndər nabi Əshaya, ji na, “Nayi ngə dahə a vər ngga a gwar tagəu, ja vər na, ‘Hya pabəri nyi lagu anə Thlagəu, hya məliya lagu tata'yi pir wu mwa nyi.’ ”

²⁴ Kə alenyi njir Farisi, njira nji səwa

²⁵ yiwa nyi, “Ma nagə a'yi Kərsiti mai, ənga nagə a'yi İliya mai, ba nagə tsu a'yi nabiya nyi mai, mi ngə da gu məl baβətizəma?”

²⁶ Əngwar Yahwana, “Nayau, ya vər məl baβətizəma anə hyi ənga 'yimi. Ama vanyi ndəra ndiya da ənga dənama a vər shili, kəra alaga sər mba βiβi nyi nayi a'yi da tsa aga ya pəlna mai.

²⁷ Ju sa məliya hyi baβətizəma ənga Mambəl Cicau ba ənga u'u.”

²⁸ Sə'yar kə patə dərkər wu Bethlani, a biyar ya dəl Urdənu, vira Yahwana a vər məl baβətizəma ari.

Yesu Zər Gamə Nə Hyal

²⁹ Əzəgəkura nyi ba Yahwana lari Yesu a vər shili lagu nyi, kə ji na, “Kəja, Zər Gamə nə Hyal, kəra həna bikə nə njir duniya!

³⁰ Ndə kə nga ya vər ndər ar kəri ta, ta yi na, abər ‘Ndə a'yi a vər shili ayukudə da, ama naja dəgal a ndiya da ara tsu dədəmə a'yi ja kadivira nja ya da.’

³¹ Nayi ənga kərda sayi səni nyi mai, ama yi shili, yi sa məl baβətizəma ənga 'yimi anə nji aga ya cabiya nyi anə njir Izirayila.”

³² Kə Yahwana ləri najaka sakida abər, “Yi lari Mambəl a vər shida sara dəməlməu, a papa mbəthla, ji sa ndzafau a dar kəra ja.

³³ Nayi ənga kərda yu səni nyi mai, ama kəl ta ndəra səwa da aga sa məl baḅətizəma ənga 'yimi nar da abər, 'Ndəra gə lari Mambəl ndzafau ar ja, naja ngu nda məl baḅətizəma anə nji ənga Mambəl Cicau.'

³⁴ Nayi tsu a lar yi səkə nyabiya dzə ar kəra ja, ca ngə da yi ləri sakida abər ndə kau, Zər Hyal ngau."

Zəmbəlma'yar Nə Yesu Nə Tanggərma
(*Matiwu 4:18-22; Markusu 1:16-20; Luka 5:2-11*)

³⁵ Əzəgəkura nyi Yahwana ənga nji məthlə sara wu pama zəmbəlma nyi'yar ar vi ta wayu.

³⁶ Kə Yahwana lari Yesu ja vər tərabiya, kə ji na, "Lara mau, Zər Gamə nə Hyal!"

³⁷ Ənggəra zəmbəlma'yar kə məthlə nggari səra Yahwana na, kə ndə nu Yesu.

³⁸ Ta Yesu shabiya dzau, ba ji lari nda nda a vər nu nyi, kə ji yiwa nda, "Mi nga hyu gala?"

Əngwar nda, "Rabi" kəra cabiya Maləmə ngau, "Əmani nga gu nggya?"

³⁹ Kə Yesu shadəwa nda, ji na, "Anda mau hya sa lari."

A ndu saka fodə nə wagəu, kə ndə ma'yi ndə nda lari viya nyi, ba ndə həna pəkə ənga ja.

⁴⁰ Andərawusu, zaməya Simanu Biturusu, a'yi ja pathlə wu pama nji məthlə kəra nu Yesu ayukuda Yahwana nana ndər ar kəra Yesu.

⁴¹ Sə tanggərma kəra Andərawusu məliya ca ngə, ji ma'yi ji nda thləwa zamə nyi Simanu, ba ji nar nyi, "A nər 'ya Ndə Cacadau" ndəra nju ngga ənga Kərsiti.

⁴² Kə ji shili ənga Simanu a shili ara Yesu.

Yesu tsamə nyi, ba ji na, “Nagə ngə Simanu zər Yahwana. Nju nda ngga ngau ənga Kefasu,” kəra ma nji shabiya ca ngə Biturusu.*

Yesu Ngga Fəlipəu Ənga Nathlaniyalu

⁴³ Əzəgəkura nyi tsu kə Yesu biya ju ma'yi a vu Galili. Kə ji thləwa Fəlipəu, kə ji na anə nyi, “Nu də.”

⁴⁴ Fəlipəu sara wu Bethlesaida nga ja, məlmər Andərawusu ənga Biturusu.

⁴⁵ Fəlipəu ma'yi ji nda thləwa Nathlaniyalu, kə ji na anə nyi, “A nər 'ya ndəra Musa tsəfəri sə ar kəri wu ləkakadə nə dladau ənga nabi'yar tsu tsəfəri, naja ngə Yesu ndər Nazəratu, zər Yusufu.”

⁴⁶ Kə Nathlaniyalu yiwa ji na, “Sə tsapəu a sən biya sara wu Nazəratu ya?”

“A ndə ga sa lari ənga kərngau,” əngwar Fəlipəu.

⁴⁷ Ta Yesu lari Nathlaniyalu a vər shili ara ja, kə ji na ar kəra ja, “Lara mau ndər Izirayila nə jijiri, ndəra gəra ənga nggyabiya fafati.”

⁴⁸ Kə Nathlaniyalu yiwa ji na anə Yesu, “Lagu mani nga gə sən də?”

Əngwar Yesu, “Ar pəci kəra gə əgya kida wur martəndəm ta nga yi lar ngau, kadivira Fəlipəu dzəgwa ngga ngau.”

⁴⁹ Kə Nathlaniyalu na, “Maləmə, nagə ngə Zər Hyal; nagə ngə Təl nə njir Izirayila!”

⁵⁰ Yesu nar nyi anə Nathlaniyalu, “Gə mbərsa ara yi nar ngə abər yi lar ngə ar pəci kəra gə əgya kida wur martəndəm ta ya? Jiri, gu nda lari səra a ndiya kau.”

* **1:42** Səra Biturusu aga nyi ca ngə tsəka.

⁵¹ Kə Yesu bəra nar nyi, “Ənga jiri nga yu na anə hyi, hyu nda lari dəməlmə a pahəri, waladi'yar nə Hyal a vər di ənga gya ar kəra Zər Ndau.”

2

Mini Hə Dzau Wu Kana Nə Məlmə Galili

¹ Ar pəci nə makərkura nyi, mini nə hə dzə a'yi wu məlmə Kana nə 'yi'yir Galili. Miya Yesu a'yi ja a ndəna.

² Yesu əkkə'yi zəmbəlma nyi'yar ma nji nggəya nda a shili ar vir mini kau.

³ Ənggəra 'yimir wur inabi kudəu, kə miya Yesu na anə nyi, “Yimir wur inabir nda a kudəri.”

⁴ Yesu shadəwa nyi, ji na, “Ama, mi ngə nər mən wu sə ka? Pəci də ma a'yi də kwatahə mai.”

⁵ Kə miya Yesu nar nyi anə njir təkə sər səm, “Nahya mau, kalar səra ji na anə hyi, ca nga hya məl.”

⁶ Ləha dzər viya nyi ha tsəka a'yi kwa, kəra njir Yahudiya wu kəbə kwatə ci dzə əni, ənggər kəra mbərsar nda cabiya. Kalar ha nyi wu sən həri əgwa kwa kwa ənga 'yimi.

⁷ Kə Yesu nar nyi anə njir təkə sər səm, “Nyanyana mə ha'yar kə patə ənga 'yimi.” Ba ndə nyanyana nda ba ar miya.

⁸ Kə ji na anə nda, “Kabangəkau, gəri nya mau a nda nə tsahwa'a.” Kə ndə gəri ndə hər nyi a nda.

⁹ Ta tsahwa'a dāhari 'yimi hyalagə kəra sha aga 'yimir wur inabi, naji sənbiya vira nji uya nyi sara ar mai, ama njir təkə sər səm wu səni. Kə tsahwa'a nggar salkwanjili a ndumwar sau,

¹⁰ kə ji na anə nyi, “Kalar ndu shili ənga 'yimir wur inabi kəra ndiya ənga məsahəu tsu kadəu,

ayukudā ndə sa, ndə nyau, ba nja shili ənga kəra cacaθəu, ama, nə ngə kau, pamə nga nyi ara nji, gə piyari kəra məsahəu kəl kabangəkau!”

¹¹ Najakə ngə sə dədəgur nə tanggərma kəra Yesu məliya, ji məliya sə kə wu məlmə Kana nə Galili. Najakə ngə cabiya kadakadarkur nyi, ənga ji məliya zəmbəlma nyi'yar mbərsa ənga ja.

*Yesu Kədləbiya Njir Shafəli
Wu Ki Hyal Aga Ja Da Cicau
(Matiwu 21:12-13; Markusu 11:15-17; Luka 19:45-46)*

¹² Ayukudā kə ngə Yesu ənga mənyi ənga zamə nyi'yar ba ənga zəmbəlma nyi'yar ma'yi a gyiwu Kafarnahumu. A gyina, ndə səkari nə pida dīyawu.

¹³ Ta pəcir lardur vəlna nə njir Yahudiya də ləhəu, kə Yesu ma'yi a du Urshalima.

¹⁴ Wu huda ki Hyal, ba ji thləwa nja vər dəlna thla, ənga təmahəu ənga mbəthla'yar aga sadaka, ba ji thləwa alenyi nji tsu nda vər bəla bəla gənnar nda.

¹⁵ Kə Yesu ləmiya kurpə sara wu əpa, ba ji kədləbiya nda patə sara wu Ki Hyal. Ji kədləbiya təmahə əkkə'yi thla, ba ji shashabiya təmbəl bəla bəla gənnar nda a dəməlmau, ənga ji tətəlma gənnar nda.

¹⁶ Kə Yesu nar nyi anə njira vər dəlma mbəthla 'yar kau, “Fa'abiya mau sə'yar kə ənggau! Hya sara shabiya ki dədə aga sugu mai.”

¹⁷ Ənggərə sə kə dərəkər, kə zəmbəlma nyi'yar dəngari sərə tsətsəfau, wu ləkakadə nə Hyal abər, “Hudə hamə nə ki Hyal a vər mbə də ənggər u'u.”

¹⁸ Kə njira nggurəm nə Yahudiya yiwa Yesu, ndə na, “Ya, mi ngə sə dədəgur kəra gu sən məliya, kəra

wu cabiya 'ya abər a'yi gə ənga dənama nə məliya sə'yar ka?"

¹⁹ Kə Yesu shadəwa nda, ji na, "Hya dlana ki Hyal kau, ba ya sa hya'ana wu pida makəru."

²⁰ Kə ndə shadəwa nyi, ndə na, "Nji həri fa fodə kumunyi apə kwa a vər hər ki Hyal kau, ya, abari nga gu sən hya'ana nyi wu pida makər ka?"

²¹ Ama ki Hyal kəra Yesu wu ndər ar kəri kau, dza ja ngau.

²² Ayukuda Yesu hya'ari sara vir tau, kə zəmbəlma nyi'yar dəngari sə kə Yesu nar nda kau. Kə ndə dzəgwa mbərsa ənga səra tsətsəfau wu ləkakadə nə Hyal ənga səra Yesu nana.

²³ Ar pəci kəra Yesu wu lardur nə vəlna wu Ur-shalima, nji gangəu mbərsa ənga ja arya sə dədəgur kəra ndu lari ji məl.

²⁴ Ama Yesu a'yi fiyafə ənga nda mai, ara ju sənbiya nji patəu.

²⁵ Naja a'yi wu yiwu nja lər sakida ar kəra nji anə nyi mai, arya ju sən səra wu dəfuwa ndapi.

3

Nikodimosu Ənga Yesu

¹ Saya da vanyi ndər Farisi a'yi kəra nja ngga ənga Nikodimosu, naja pathlə wu pama njira nggurəm nə Yahudiya.

² Ji shili əgya Yesu uvu'yi, ji sa na, "Maləmə, 'yi wu səni abər nagə maləmə ngau, sara ara Hyal, arya ndər sən məliya sə'yar kə ga vər məl kə a'yi mai, kəl ndəra Hyal ənga ja."

³ Kə Yesu shadəwa nyi, ji na, “Yi wu nar ngau jirkura nyi, ndər sən gwu təlkur Hyal a'yi mai kəl ma nji bəra yabiya nyi nə məthləkura nyi.”

⁴ Kə Nikodimosu yiwa nyi, ji na, “Lagu mani nga nja bəra sən yabiya ndəra a halər ka? Ja bəra sən sha a vu hudā mənyi aga nja bəra yabiya nyi nə məthləkura nyi ya?”

⁵ Yesu shadəwa nyi, ji na, “Jiri nga yu na anə ngau, ndər sən gwu təlkur Hyal a'yi mai, kəl nji bəra yabiya nyi nə 'yimi ənga nə Mambəl.

⁶ Səra ndapi yabiya ndə ngau, ama səra Mambəl yabiya tsu mambəl ngau.

⁷ Ja sara dā sə dədəgur anə ngə mai, ara yi na, abər, ‘Kəl nji bəra yabiya ngə nə məthləkura nyi.’

⁸ Yambadə wu sə a ndar vira ju yiwu. Gu nggari ənggəra ju sau, ama nagə wu sən nana vira ji hya'ari sara ari ənga vira ju ma'yi a ndar tsu mai. Abangə nga nyi tsu ənga ndəra nji yabiya nyi wu Mambəl.”

⁹ Kə Nikodimosu yiwa Yesu, ji na, “Abari ngə səkə wu sən dā?”

¹⁰ Kə Yesu shadəwa nyi, ji na, “Ya, nagə maləmə dəgal ngau wu Izirayila, ama nagə wu nggabiya sə'yar kə mai ya?

¹¹ Jiri nga yu na anə ngau, 'yi wu ndər ar kəra səra 'yi wu səni, ənga 'yi wu lər sakida ar kəra səra 'yilari, ama alaga abangau nahyi a'yi dləwuri sakidar 'ya kə mai.

¹² Ma yu ndər anə hyi ar kəra səra wu duniya, nahyi mbərsa əni mai, abari nga hyu sən nda mbərsa ma yi ndər anə hyi ar kəra səra a dəməlma?

¹³ Ndə a'yi kəra saya ma'yi a dəməlmə mai, kəl naja Zər Ndə kəra shida sara dəna.

¹⁴ Ənggər kəra Musa har pabau a dar wu tagə mashi ta, abangə tsu kəl nji hya'ana Zər Ndau a dar wu,

¹⁵ aga kalar ndəra mbərsa ənga ja wu uya pi gəra kudau.”

¹⁶ “Arya Hyal ca yiwukur anə njir duniya gagadau, ca ngə da ji ləri Zər nyi zəmə pir, aga kalar ndəra hənggəri ənga ja, naji wu tə mai, ama ju uya pi gəra kudau.

¹⁷ Arya Hyal a'yi səwa Zər nyi a shida wu duniya aga ja sa məlha nyi numa anə duniya mai, ama aga njir duniya a uya mbədau lagu nyi.

¹⁸ Kalar ndəra mbərsa ənga Zər Hyal, numa a'yi wu səm nyi mai. Ama kalar ndəra a'yi mbərsa ənga ja mai, numa a səmku nyi ri tsu kadə ara naji mbərsa ənga thləmə Zər Hyal kəra zəmə pir mai.

¹⁹ Kəja səra ju nda məl numa ar kəri, mbəmbəl shili wu duniya, ama njir duniya wu yiwu kuthləu a ndiya mbəmbəl ara sər məla nda dəmwa'yu.

²⁰ Kalar njira wu məl sə dəmwa'yu, shishir dza nda wu yiwu mbəmbəl mai, ara hivər sər məla nda a biyar babal.

²¹ Ama njir məl səra tsa'a ndu shili ar vi mbəmbəl, aga nja lari ar babal abər səra ndu məl səra Hyal wu yiwu ngau.”

*Yahwana Ndər Məl Baḅətizəma
Bəra Lər Sakida Ar Kəra Yesu*

²² Ayukuda kau, kə Yesu ənga zəmbəlma nyi'yar ma'yi a ndar 'yi'yir Yahudiya. A ndəna ji nda ḅəliya sar kushu, ju məl baḅətizəma anə nji.

²³ Yahwana nə nyi tsu ja vər məl baḅətizəma anə nju məlmə Ayinanu kəra ləhəu wu dzər məlmə

Salimu, ara 'yimi a'yi gangəu a ndəna. Nji kəl shili nga ndu shili ju məl baḅətizəma anə nda.

²⁴ (Səkə ḁarkər kadivira nji fuwa Yahwana wu fursəna.)

²⁵ Kə zəmbəlma 'yar nə Yahwana gu kəpal ənga vanyi ndər Yahudiya ar kəra ci dzə kəra dladə nana nja məl.

²⁶ Ndə shili əgya Yahwana, ndə sa na anə nyi, “Maləmə, ndə ta ənga gə a biyar ya dəl Urdənu ta, ndə ta gə ləri sakida ar kər ta, kəja ja vər məl baḅətizəma anə nji ənga patər nja vər sha shili ara ja.”

²⁷ Kə Yahwana shadəwa nda, ji na, “Ndər sən dləwuri sə a'yi mai, kəl sərə Hyal nə nyi.

²⁸ Nahyi ənga kərhyi ngə sakida ḁa arya yi na anə hyi, 'Nayi ngə Kərsiti mai, ama Hyal səwa ḁa wu mwa nyi.’

²⁹ Ar pəcir hə dzau, kwanjili nə sal kwanjili ngau. Bazhiya sal kwanjili kəra shili ar vir hə dzə kau, kəl səkə nga ja, aga ja nggari ḁaha sal kwanjili. Ju nyi ənga hudə pipida ma ji nggari sal kwanjili a vər ndər. Lagu kə tsu ngə hudə pipida ḁa a nyabiyar dzau.

³⁰ A ḁari tsa'a ja cakau, nayi tsu ya gənna dzau.

³¹ “Ndəra shida sara a dəməlmau, naja nga adabanga nji patəu. Patər njira wu duniya nə duniya ngau, ənga ndu ndər ar kəra sər duniya. Ndəra shida sara a dəməlmau, naja nga adabanga nji patəu.

³² Ju ləri sakida sərə ji ləri ənga ji nggari, alaga abangau, ndə a'yi kəra mbərsa ənga sakida nyi mai.

³³ Ama kalar ndəra dləwuri sakida nyi a cabiyari abər Hyal ndə jijiri ngau.

³⁴ Ara ndəra Hyal səwa, ndər Hyal nga ju na, arya Hyal nə nyi Mambəl nyi nyinyau.

³⁵ Tada wu yiwu Zər nyi, ba ji fuwa patər sə wu tsa ja.

³⁶ Kalar ndəra mbərsa ənga Zəra nyi a'yi ja ənga pi gəra kudəu. Ndəra gəra bəla sərə Zəra nyi nana, naji wu uya pi mai, ama Hyal wu dəfu ənga ja.”

4

Yesu Ndər Ənga Mala Sara Samariya

¹ Njir Farisi nggari abər Yesu a vər dumwa ənga uya nji, ənga məl baβətizəma anə zəmbəlma gangəu a ndiya Yahwana.

² Kwalaga kə a'yi Yesu ənga kərnyī nga vər məl baβətizəma kə mai, ama zəmbəlma nyi'yar ngau.

³ Ənggəra Yesu nggari abangau, kə ji piyari 'yi'yir Yahudi ba ji bəra sha a vu 'yi'yir Galili.

⁴ Kabangəkə a mbari kəl Yesu ja tərabiya wu Samariya.

⁵ Kə ji dila wu vanyi məlmə wu 'yi'yir Samariya kəra nja ngga ənga Sayika. Vi kau, ləhə nga nyi a dzər vira Yakubu nə nyi anə zər nyi Yusufu.

⁶ Ar vi kau, məla nə Yakubu a'yi. Ar pəci kəra Yesu hədə ənga bau, ba ji bəliya sar a miya məla nyi. Səkə dərkər ənggər saka kumo apə məthlə nə puci.

⁷ Kə vanyi mala nə Samariya shila gwa məla. Kə Yesu na anə nyi, “Usi, gər də 'yimi ya təwari.”

⁸ (Zəmbəlma nyi'yar tsu a ma'yir nda a vu huda məlmə aga nda vuwa dəl sər səm.)

⁹ Kə mala Samariya kə na anə Yesu, “Abari nagə ndər Yahudiya a sən yiwa 'yimi ara ya, nayi

mala Samariya?” (Ara sə a'yi kəra wu daḅəri ndər Yahudiya ənga ndər Samariya mai.)*

¹⁰ Əngwar Yesu, “Maja abər gu səni sə kurthlə nə Hyal kəra ju lau, ənga ndəra na anə ngau, ‘Gər da ‘yimi ya təwari,’ gu sən yiwa nyi, ba ja nə ngə ‘yimi nər lə pi.”

¹¹ Kə mala kə na, “Maləmə, kəja sər gə ‘yimi a'yi ara gə mai, ya, kəja mələ kə dzəgamə nga nyi, lagu mani nga gu sən gər da ‘yimi lə pi ka?

¹² Dəm ya, naga ndiya dər ‘ya Yakubu, ndəra labiya ‘ya mələ kə ya? Naja ənga kərnyi ma, ji sa ‘yimi sara a gwa, ənga wazha nyi ba ma ‘wi nyi ‘yar.”

¹³ Yesu na, “Kalar ndəra sa ‘yimi kau, hili wu bəra nda tə nyi wayu.

¹⁴ Ama ndəra sa ‘yimi kəra yu lə kau, naji wu bəra nggar hili mai ba ‘anuwa. ‘Yimi kəra yu lə kau, wu nda da wu ja ənggər mandəli ‘yimi kəra wu huhwi sara wu dza ja kəra wu nə nyi pi gəra kudau.”

¹⁵ Əngwar mala kau, “Maləmə, nə da ‘yimi kau, ara ya sara bəra nggari hili, ənga ya bəra shili ənggau ya sa gə ‘yimi.”

¹⁶ Kə Yesu na, “Ma ‘yi ga nda shili ənga sal ngau.”

¹⁷ Əngwar ja, “Sal a'yi ara yi mai.”

Əngwar Yesu anə nyi, “A nabiyar gə jiri ənggəra gə na abər, ‘Sal a'yi ara yi mai.’

¹⁸ Arya jirkura nyi ca ngə a hər gə shili paməpamə təfu, ənga ndə kə gə əni kabangəkə kə sal ngə mai, a nabiyar gə jiri.”

¹⁹ Əngwar ja, “Ndə dəgaləu, maya nggani nagə nabi ngau.

* **4:9** Kwalaga cala miya ha nə njir Samariya njir Yahudiya wu məl thlər əni mai.

²⁰ Əjir 'ya dləvə Hyal ar mə kau. Ama əngwar hyi njir Yahudiya wu Urshalima ngə vira nja kyaga dləvə Hyal.”

²¹ Kə Yesu na, “Mala, mbərsa ənga sərə yu na kau, arya pəci a vər shili kəra nji tsu wu nda dləvə Tada ar mə kə mai, alaga wu Urshalima mai.

²² Nahyi njir Samariya nahyi wu səni ndəra hyu dləvə mai, na'ya 'yi wu səni ndəra 'yi wu dləvau, ara mbədaui shili sara ara njir Yahudiya.

²³ Ama pəci a vər shili, pəca nyi ma a shiliri, kəra njir dləvə Tada ənga jiri wu nda dləvə nyi wu mambəl ba ənga jirkur, ara Tada wu gal culi nji kə nga dləvə nyi.

²⁴ Hyal Mambəl ngau, njir dləvə nyi kəl nda dləvə nyi wu mambəl ba ənga wu jirkur tsu.”

²⁵ Mala kə na, “A sən yi abər Ndə Cacaɖau a vər shili ndəra nju ngga nyi ənga Kərsiti. Ma ji shili ju sa cabiya 'ya patər sau.”

²⁶ Yesu na, “Nayi ndəra vər ndər anə ngau nayi ngau.”

Zəmbəlma 'yar Bəra Sha Shilara Yesu

²⁷ Ar pəci kə ngə zəmbəlma nyi'yar sha shili, ba ɖa sə dədəgur anə nda ənggəra ndə thləwa nyi ja vər ndər ənga mala. Ama ndər sən yiwa, “Mi nga ga gal ənga mala ka?” Ənga ndər sən na anə nyi, “Mi ngə ɖa gu ndər ənga ja?” a'yi tsu mai.

²⁸ Kə mala kə piyari təm gwa mələ nyi, ba ji ma'yi a vu huɖa məlmau, ji vuwa nar nyi anə nji,

²⁹ “Shila mau, hya sa ləri ndəra nar ɖa sərə yi saya məlna patəu. Abər naja ngə Kərsiti ya?”

³⁰ Kə nji bibiya sara wu huɖa məlmau, kə ndə shili əgya Yesu.

³¹ Ar pæci kə ngə zəmbəlma nyi'yar a vər kədi Yesu, “Maləmə, səm sau.”

³² Ama kə Yesu shadəwa nda, ji na, “Sər səm a'yi ara yi kəra yu sən səm ama nahyi wu sən mai.”

³³ Kə zəmbəlma nyi'yar yiwa kərnda, ndə na, “Abər vanyi ndə dabaga shili ənga sər səm anə nyi ya?”

³⁴ Ama kə Yesu shadəwa nda, ji na, “Sər səm da ca ngə ya məl səra ndəra səwa da wu yiwu ənga ya nyabiya thlər nyi cipəu.

³⁵ Hyu na abər, ‘A hyiri hya fodə aga fwaha da.’ Ama yu na anə hyi, hya pahəna liya hyi mənəhəu aga hya tsamə vu huda fa, ara a nər nda patə tsa'a aga gəm kabangəkau.

³⁶ Ndər gəm fa wu uya akkəri nyi, ənga ju kaḃiya sə zəzəwa nyi, ca ngə cabiya njira ju kaḃiya aga nda uya pi gəra kudau. Lagu kə ngə njir thləka ənga njir gəm sər fa ndu nyabiya dzə ənga hudə pipida aga zəməu.

³⁷ Ənggə ngə karapə kə nyabiya dzə ənga jirkur, ‘Vanyi ndə thlər nyi ca ngə thləka, vanyi ndə tsu thlər nyi ca ngə gəm.’

³⁸ Yi səwa hyi aga hya gəm səra hyi gəra lari ḃwaḃwatə a vər thləka. Alenyi nji a lar nda ḃwaḃwatəu, nahyi tsu a uyar hyi akkəri nə thlər ḃwaḃwatər nda.”

Njir Samariya Gangəu Hənggəri

³⁹ Njir Samariya gangəu sara wu məlmə kə mbərsa ənga Yesu arya ndər mala kə kəra ji na, “Ji nar da patər səra yi saya məliya.”

⁴⁰ Ənggəra njir Samariya shili əgya Yesu, kə ndə sa kədi nyi ja nggya əkkə'yi nda, ba ji nggya əkkə'yi nda nə pida məthləu.

41 Nji gangə tsu bəra mbərsa ənga Yesu arya səra ji nar nda.

42 Kə njir Samariya dzəgwa na anə mala kau, “Kabangəkau, a hənggər 'ya jiri, a'yi ara səra gə na waci mai, ama ara na'ya ma a nggar 'ya səra ji na ənga kər'ya, ənga a dləwunggəri 'ya ndə kə naja ngə ndər mbəda duniya.”

Yesu Mbədāna Zər Ndə Dəgaləu

43 Ayukuda pida məthləu, kə Yesu piyari 'yi'yir Samariya ji ma'yi a vu 'yi'yir Galili.

44 (Arya Yesu ənga kərnyɪ a nanari abər, “Nabi a'yi wu uya hakər wu məlmə nyi mai.”)

45 Ar pəci kəra ji vu Galili, kə njir Galili dləwuri nyi ənga hudə zəmə ara nanda ənga kərnda a lari nda səra Yesu məlna a vu Urshalima ar pəcir lardur nə vəlna kəra nanda ma a vur nda.

46 Kə Yesu bəra sha a vu Kana wu Galili, vira ji shabiya 'yimi a ndu 'yimir wur inabi. A ndəna vanyi ndə dəgal nə ki təl a'yi kəra zər nyi gəra ngga a vu Kafarnahumu.

47 Ənggəra ndə kə nggari abər Yesu a dlari wu Galili sara wu Yahudi, kə ji ma'yi a ndəgya ja, ji nda kədi nyi aga ja shili wu ki nyi, ja sa mbədāna zər nyi kəra citəu a miya tau.

48 Kə Yesu shadəwa nyi, ji na, “Kəl ta hyi lari mətsamə ənga sə dədəgur ara yau, ca ngə də hyi mbərsa.”

49 Kə ndə dəgal nə ki təl ta na anə Yesu, “Ndə dəgaləu, shili ma ma'yi a ndu ki də ara zər də ka sara tau.”

⁵⁰ Kə Yesu na anə nyi, “Ma'yi sə ngau, zər ngə kə wu tə mai.” Ndə kə tsu, ba ji mbərsa ənga sərə Yesu na anə nyi, ba ji ma'yi sə nyi.

⁵¹ Tsu ja ar lagu ja vər ma'yi a ndu ki, ba ji bə ənga njir məl thlər nyi ar lagu, kə ndə na anə nyi, “Zər ngə ta a dāri jaməu.”

⁵² Kə ji yiwa nda pəci kəra sə kə darkər. Əngwar nda anə nyi, “Na, ənggər saka pathlə nə puci ngə gyangə kə siya nyi.”

⁵³ Kə dəya zər kə tsamə ri abər ar pəci kə ngə Yesu na anə nyi, “Ma'yi sə ngau, zər ngə kə wu tə mai.” Kə ndə kə ənga njir ki nyi mbərsa ənga Yesu.

⁵⁴ Najakə ngə sə dədəgur nə məthləkura nyi kəra Yesu məliya ayukudā ji piyari Yahudi ji shili wu Galili.

5

Yesu Mbədāna Ndau A Miya Dəl Fa'a

¹ Ayukudā kau, kə Yesu ma'yi a du Urshalima aga mini nə njir Yahudiya.

² A du Urshalima tsu, vanyi dəl fa'a a'yi kəra nji zəwuya ənga sə ənggər dza'wu paməpamə təfu. Nju ngga fa'a kə ənga miya njir Yahudiya, Bethlesaida. Dəl fa'a kə ləhə nga nyi a dzər miya ki kəra nju ngga ənga Miya Ki Təmahəu.

³ Əgya kidā dza'wu'yar kə ngə nji gəra ngga, ənga nji ləfau, ənga nji kadal ba ənga nji təsəkənu gangəu wu pida.

⁴ [Ndə wu sə kau aga nja gwazhiri 'yimiya nyi. Arya ga pəci ga pəci ngə waladi nə Thlagə wu shida ja sa gwazhiri 'yimi kau. Ndəra a gwa tanggərma, ba ja uya jaməkur sara ara shiləgə nyi.]

⁵ Ənggə tsu vanyi ndə a'yi kəra məliya fa makərkumunyi apə cisu ənga təsəkənu.

⁶ Ta Yesu lari nyi a'yi pida, ənga tsu ju səni abər ndə kə a bəliyar sar ənga təsəkənu kau, kə Yesu na anə nyi, “Gu yiwu ga də jamə ya?”

⁷ Kə ndə təsəkənu kə na, “Ndə dəgaləu, nayi a'yi ənga ndər dləwa də ma nji gwazhiri 'yimiya nyi mai. Ma yi məl abər aga ya sən gwa ba vanyi nda gwa a mwa ara yau.”

⁸ Kə Yesu na anə nyi, “Hya'ari ga həri buci ngau, ba ga bə ga ma'yi.”

⁹ Aga zəmə ba nda nyi də jaməu, kə ji həri buci nyi ba ji bəu.

Sə kə dərkər ar pəcir bəlsar nə njir Yahudiya.

¹⁰ Agabəngau, kə njira nggurəm nə Yahudiya nar nyi anə ndə kəra nji məliya jamə kau, “Əshina pəcir bəlsar ngau, naga kyaga məl thlər mai, dladər mənə kar ngə ri ara hə buci ngau.”

¹¹ Kə ndə kə shadəwa nda, ji na, “Ndəra məliya də jamə ngə na anə də, ‘Həri buci ngau ga bəu.’ ”

¹² Kə ndə yiwa nyi, ndə na, “Wa ngə ndə kə na anə ngau, ga hər buci ngau, ga bə ka?”

¹³ Ndə kə nji shiləgəbiya kə wu səni tara wa ngə məliya nyi jamə kə mai, arya Yesu a ma'yiri a vu pama dlamir nji kəra a ndəna.

¹⁴ Ayukudə pəci kushu, ba Yesu thləwa nyi wu ki Hyal, ba ji na anə nyi, “Lari, a dər gə jaməu. Ga piyari məl bikau ara sə dəmwa'yi a ndiya kə a sara də ənga gau.”

¹⁵ Kə ndə kə ma'yi ji nda nar nyi anə njira nggurəm nə Yahudiya abər Yesu ngə məliya nyi jaməu.

Pi Lagu Zəra Nyi

¹⁶ Ara abangau, ba ndə dzəguya ndər papatagə anə Yesu, ara ju məl sə'yar kə Pəcir Bəlsar.

¹⁷ Kə Yesu na anə nda, “Dədə a vər məl thlər nyi ba'anə kabangəkau, nayi tsu ya vər məl thlər.”

¹⁸ Arya ndər kau, ngə njir Yahudiya wu gal lagu kəra nda tsəya nyi ari. Əngwar nda, “A'yi wacu ara ji bəlna səra dladə na ar kəra Pəcir Bəlsar mai, ama ara ju ngga Hyal ar viya dənyi, lagu ta nga ju gəla kəryni kakalə ənga Hyal.”

¹⁹ Kə Yesu shadəwa nda, ji na, “Ənga jiri nga yu na anə hyi, sə a'yi kəra Zər wu sən məliya ənga kəryni mai, səra ji lari Dənyi a vər məl, ca nga ju məl. Ara kalar səra Dənyi a vər məl, ca ngə Zər wu məl tsu.

²⁰ Ara Tada wu yiwu Zəra nyi, ca nga ju canə nyi kalar səra ju məl ənga kəryni. Ba tsu ju canə nyi səra ndiya sə ənggər kə aga ja də sə dədəgur anə hyi.

²¹ Ənggər kəra Tada sən hya'ana nji tətə ja nə nda pi, abangə tsu Zər wu sən nə nyi pi anə kalar ndəra ju yiwu.

²² Tada wu məl numa anə nji mai, ara a nə nyir ja dənəma nə məl numa anə Zər nyi,

²³ aga patər nji nda nə nyi dəgalkur anə Zəra nyi, ənggəra ndu lə dəgalkur anə Tada. Kalar ndəra gəra nə nyi dəgalkur anə Zəra nyi, naja a'yi nə nyi dəgalkur anə Dənyi kəra səwa nyi mai.

²⁴ “Ənga jiri nga yu na anə hyi, kalar ndəra wu nggar ndər də, kə ji mbərsa ənga ndəra səwa də, a'yi ja ənga pi gəra kudau. Nju nda məl numa anə nyi mai, ama a tərəbiyar ja sara wu tau, a ndu pi.

²⁵ Ənga jiri nga yu na anə hyi, pəci a vər shili, pəca nyi ma a shiliri, kəra nji tətə wu nda nggar dəha Zər

Hyal, njira nggari ndu nda da a'yi ənga pi.

²⁶ Ənggər kəra Tada da thlagər pi, abangə tsu nga ji nə nyi dənəma anə Zəra nyi aga ja da thlagər pi.

²⁷ Ənga tsu ji nə nyi dənəma nə məl numa anə kalar ndau ara naja Zər Ndau.

²⁸ Ndər kə a sara da sə dədəgur anə hyi mai, ara pəca vər shili kəra patər njira a gu hu wu nda nggar dāha ja,

²⁹ ba nda biya. Njira məliya sə mənəhəu ndu hya'ari ənga pi gəra kudau, ama njira məliya sə dəmwa'yi ndu hya'ari ba nja məliya nda numa.

³⁰ Sə a'yi kəra yu sən məliya ar kərda mai. Yu thla numa ənggər kəra Hyal wu na anə da. Agabəngau, numa da kakalə nga nyi, arya a'yi səra yu yiwu nga yu məl mai, ama səra ndəra səwa da wu yiwu.

Sakida Ar Kəra Yesu

³¹ “Ma yi ləri sakida ar kəra kərda, sakida kə a'yi dlədləwu mai.

³² Ama vanyi ndə paməu a'yi kəra wu lə sakida ar kəra yau, a sən yi abər sakida nyi jijiri nga nyi.

³³ “Hyi səwa nyi nji anə Yahwana, naja, ba ji lər hyi sakida kəra jiri.

³⁴ Alaga abəngau, a'yi yu nggya aga sakida nə ndapi mai. Ama yi nar hyi abəngau aga hya uya mbəda.

³⁵ Yahwana ənggər pitəlla mbəmbəl nga ja kəra ləri mbəmbəl nyi, nahyi tsu, kə hyi caguli nə mbəmbəl nyi nə pəci kushu.

³⁶ “Ama a'yi yau ənga sakida kəra ndiya kəra Yahwana ləri ar kəra yau. Sə kəra ya vər məl kau, sə ngau kəra dəda nə da aga ya məl ənga ja vər lə sakida ar kəra yau, abər dəda ngə səwa da.

³⁷ Dəḏa tsu, ndəra səwa ḏa, nga vər lə sakida ar kəra yau. Nahyi saya nggar ḏaha ja mai, ənga tsu nahyi saya lari nyi ənga li tara wa nga ja mai.

³⁸ Ndər nyi tsu wu nggya wu ḏəfuwa hyi mai, arya nahyi mbərsa ənga ndəra ji səwa mai.

³⁹ Nahyi kəl dumwa ənga jiga səra tsətsəfau wu ləkakadə Hyal, ara hyu nggani a gwa nga hyu uya pi gəra kudau. Najaka sə kəra nji tsəfəri wu ləkakadə Hyal kau, nanda ngu lər sakida ar kəra yau.

⁴⁰ Ama alaga abangau, kə hyi nggəl ara shili əgya yi aga hya sa uya pi.

⁴¹ “Nayi wu gal fal sara ara nji mai,

⁴² ama yu səni hyi. A'yi hyi ənga yiwu Hyal a vu ḏəfuwa hyi mai.

⁴³ Nayau, yi shili wu thləməṛ dəḏa, ama nahyi dləwur ḏa mai, ama ma vanyi ndə shili wu thləməṛ kənyi ba hya sa dləwuri nyi.

⁴⁴ Abari nga hyu sən mbərsa ma hyu dləwu fal ara kuvwar hya, ama nahyi wu gal lagur dləwu fal sara ara Hyal zəmə pir maya?

⁴⁵ A sara hya ḏənga abər yu nda wula hyi ara Tada mai. Ndər wula hyi a'yi, naja ngə Musa, ndəra hyu fə ḏəfu ju nda dləwar hyi.

⁴⁶ Maja abər hyi mbərsa ənga Musa, a hənggər hyi jiri ənga yau, arya Musa tsəfəri ar kəra yau.

⁴⁷ Ama ma nahyi a'yi mbərsa ənga səra ji tsəfəri mai, abari nga hyu sən mbərsa ənga səra yu na?”

6

Yesu Səməna Nji Dubu Təfu
(*Matiwu 14:13-21; Markusu 6:30-44; Luka 9:10-17*)

¹ Ayukudā pāci kushu, kə Yesu tərabiya nadə a biyar ya dəl Galili (najakə ngə dəl Tiberiyasu).

² Ənggau, dlamir nji gangəu wu nu nyi arya sə dədəgur kəra ndə lari ji məliya anə nji gəra ngga, ənggəra ji shiləgəbiya nda.

³ Kə Yesu ma'yi a dar kəra mau, a ndəna ji da nggya əkkə'yi zəmbəlma nyi'yar.

⁴ Ar pāci kə lardur nə vəlna nə njir Yahudiya a dāri ləhəu.

⁵ Ənggəra Yesu hya'anakər ba ji lari dlamir nji gangəu a vər shili əgya ja, kə ji nar nyi anə Fəlipəu, “Əmani nga mənə sən dəlbiya sər səm kəra wu sən səmənə nji ka?”

⁶ Yesu yiwa sə kə ara Fəlipəu, aga ja dzəbiya nyi, arya naja ənga kərnyu ju sən səra ju nda məl.

⁷ Kə Fəlipəu shadəwa nyi, ji na, “Alaga gənna nə ki ndər məl thlər nə zada fa* a sən dəlbiya səra nji ka sən fuwa wu miya nda mai!”

⁸ Kə pathlə wu pama zəmbəlma Yesu kəra nju ngga ənga Andərawusu, zaməya Simanu Biturusu, na anə Yesu,

⁹ “Kəja vanyi zər kushu ənggau ənga macikəl lugu dəfə təfu ənga kalfi məthləu. Ama mi ngə səra ju sən məliya anə nji gangə ka?”

¹⁰ Kə Yesu na anə zəmbəlma nyi'yar, “Nar nya mau anə nji nda nggya gya.” Ar vi kə sar a'yi gangəu. Kə nji patə nggya gya, gangəkura shili zhizhir nda a kari dubu təfu.

¹¹ Kə Yesu həri macikəla nyi, kə ji usaku Hyal, ba ji tətəkəya nyi anə njira a'yi nggya gya patər səra

* 6:7 Ar viya dinari gharu məthləu.

ndu yiwu. Abangə tsu nga ji məliya ənga kalfiya nyi.

¹² Ayukuda ndə səm ndə nyau, kə ji nar nyi anə zəmbəlma nyi'yar, “Tsəmiya mau kalar səra hiyau ara sə a sara wir.”

¹³ Kə zəmbəlma nyi'yar tsətsəmiya kalar səra hiyau wu miya nda, ba ndə nyanyana tsəla kumo apə məthləu sara wu macikəl lugu təfu ta.

¹⁴ Ənggəra dlamir nji lari sə dədəgur kəra Yesu məliya, kə ndə na, “Gəra ənga kəpal, ndə ngə nabi kəra duniya wu səkə shili nyi ta.”

¹⁵ Ta Yesu lari ndu sha lagu fə nyi aga tələr nda, ba ji gwadəna nda, ba ji ma'yi sə nyi a du mau.

*Yesu Bau A Dar Kəra 'Yimi
(Matiwu 14:22-33; Markusu 6:45-52)*

¹⁶ Ənggəra wagə də, kə zəmbəlma Yesu 'yar ma'yi a gwu dəl.

¹⁷ Kə ndə gwa gwu kwambwal aga nda tərəbiya a vu Kafarnahumu. Ar pəci kəra nda a vir ma'yi, kə vi də zəgutu, ama tsu Yesu gəra shili əgya nda.

¹⁸ Kə dəl dzəguya kənggədə gagaɗau ara culi yambadə kəra a vər sau ənga dənama.

¹⁹ Ayukuda ndə ɓar ɓau a də nə miyal makəru, kukuthlə ba ndə lari Yesu a vər shili əgya kwambwalər nda, ja vər ɓau ar kəra 'yimi, ba səkə gərahəya nda gagaɗau.

²⁰ Ama kə Yesu na anə nda, “Nayi ngau, hya sara hivər mai.”

²¹ Ənggau kə ndə hənggəri aga nda dləwuri nyi a gwu kwambwalər nda. Ənggərna kə kwambwalər nda thləwa miya dəl vira nda a vər nu a ndari.

Nji Biya Aga Gal Yesu

²² Ənggəra vi sa kudau, kə dlamir nji kəra hiyau a biyar ya dəl tsamə ri abər kwambwal zəmə kəra hiyau ca ngə zəmbəlma Yesu 'yar ma'yi a gwa, ama kə ndə tsamə ri abər Yesu a'yi ma'yi əkkə'yi nda mai.

²³ Kə alenyi kwambwal'yar shili sara wu Tiberiyasu, ndə sa ta'yi ləhəu ar vira Thlagə səməna nji ənga macikəl kəra ji fənggəri nyi barka.

²⁴ Ta nji lari abər Yesu ənga zəmbəlma nyi'yar a'yi ar vi ta mai, ba ndə gu kwambwal'yar, ndə ma'yi a vu Kafarnahumu aga vuwa gal Yesu a vuna.

Yesu Ngə Macikəl Nə Pi

²⁵ Ənggəra ndə biya thləwa nyi a biyar ya dəl, kə ndə na anə nyi, “Maləmə, ənuwa nga gə shili ənga?”

²⁶ Kə Yesu shadəwa nda, ji na, “Ənga jiri nga yu na anə hyi, hyu gal da a'yi ara sə dədəgur kəra hyi lari yi məliya mai, ama arya macikəl ta hyi səm hyi nyi əni ta.

²⁷ Hya sara hədə a vər gal sər səm kəra wu sən dzə mai, ama hya məl thlər nə gal sər səm kəra gəra sən dzau, ənga tsu ju ləri pi kəra gəra kudau. Naja kə ngə sər səm kəra Zər Ndau, wu sən nər hyi. Arya naja Zər Ndau ngə Hyal Tada nə nyi dənəma nə məl abəngau.”

²⁸ Kə ndə yiwa nyi, ndə na, “Mi ngə sərə Hyal wu yiwu 'ya mələ?”

²⁹ Kə Yesu shadəwa nda, ji na, “Kəja sərə Hyal wu yiwu hya məl, hya mbərsa ənga ndəra ji səwa.”

³⁰ Kə ndə yiwa nyi, “Mi ngə sə dədəgur mətsamə kəra gu sən məliya aga 'ya dabəga lari ba 'ya hənggəri ənga ga? Mi nga gu sən məliya?

³¹ Əjir 'ya səm səra nju ngga ənga mana a gwa tagəu, ənggər kəra tsətsəfau abər, 'Ji nə nda sər səm sara dəməlmə aga nda səm.' ”

³² Kə Yesu shadəwa nda, ji na, “Ənga jiri nga yu na anə hyi, a'yi Musa ngə nə hyi sər səm sara dəməlmə mai, ama dədə ngə nər hyi sər səm nə jijiri sara dəməlməu.

³³ Arya sər səm nə jiri nə Hyal ca ngə ndəra shida sara dəməlmə ju lə pi anə duniya.”

³⁴ Əngwar nda anə nyi, “Maləmə, mbar ka-bangəkə ga dumwa ənga lə culi najaka sər səm anə 'ya.”

³⁵ Kə Yesu nar nda, “Nayi ngə macikəl nə pi. Kalar ndəra shili əgya yau, naja tsu bəra nggari wuḅu mai, ənga kalar ndəra hənggəri ənga yau, naji wu bəra nggari hili mai.

³⁶ Ama ənggəra yi nar hyi ta, a lar dər hyi, ama alaga abəngəu nahyi hənggəri ənga yi mai.

³⁷ Patər njira Tada nə də, ndu shili ara yau, ənga kalar ndəra shili ara yau, nayi wu kədlə nyi mai.

³⁸ Arya yi shida sara dəməlməu, a'yi aga ya sa məl səra yu yiwu mai, ama səra ndəra səwa də wu yiwu.

³⁹ Səra ndəra səwa də wu yiwu, ca ngə alaga ndə zəmə a sara sa wu tsa yau, wu njira ji nə də mai, ama aga ya hya'ana nda sara vir tau, ar pəcir kuḁiya duniya.

⁴⁰ Arya səra Dədə wu yiwu ngəu, ca ngə kalar ndəra fər li ar Zər, ənga ji hənggəri ənga Zəra nyi, ju uya pi gəra kuḁəu, ənga tsu yu nda hya'ana nyi sara vir tau, ar pəcir kuḁiya duniya.”

⁴¹ Kə njir Yahudiya dzəguya ngwungwuni wu pamə ar kəra Yesu ara ji na, “Nayi ngə macikəl kəra

shida sara däməlməu.”

⁴² Kə ndə na, “A'yi Yesu ngə wa? Zər Yusufu, ndəra 'yi wu səni dənyi ənga mənyi ta wa? Ya, abari nga ju na abər, ‘Yi shida sara däməlmə’?”

⁴³ Kə Yesu şadəwa nda, ji na, “Piyara mau ng-wungwuni wu pama hyi.

⁴⁴ Ndər sən shili əgya yi a'yi mai, kəl ma Tada kəra səwa də tədər nyi a shili, nayi tsu yu nda hya'ana nyi sara vir tau, ar pəcir kuđiya duniya.

⁴⁵ Nji tsəfəri wu ləkakadə nə nabi'yar abər, ‘Patəkura nda Hyal ngu nda highiḃə anə nda.’ Kalar ndəra səya nyi himi anə Tada ənga ji highiḃər sə ara ja, ju shili əgya yau.

⁴⁶ Ndə a'yi kəra saya lari Tada mai, kəl ndəra hya'ari sara ara Hyal, naja ngə ndəra saya lar Tada.

⁴⁷ Jiri nga yu na anə hyi, kalar ndəra mbərsa a'yi ja ənga pi gəra kuđau.

⁴⁸ Nayi ngə macikəl nə pi.

⁴⁹ Əjiya əjir hyi səm səra nju ngga ənga mana wu tagəu, ama ba ndə ḃəra tau.

⁵⁰ Ama kəja macikəl kəra shida sara däməlməu, kalar ndəra səmku naji wu tə mai.

⁵¹ Nayi ngə macikəl nə pi kəra shida sara däməlməu. Kalar ndəra səm najaka macikəl, ju nggya ənga pi nə ba'anuwə. Najaka macikəl kumər dza yi ngau, kəra yu ləri aga duniya a uya pi.”

⁵² Kə njir Yahudiya gu kəpal gagađau wu pama nda, ndu na, “Abari ngə ndə ka sən nə mən kumər dza ja aga mənə səma?”

⁵³ Əngwar Yesu anə nda, “Ənga jiri nga yu na anə hyi, kəl ma hyi səm kumər dza Zər Ndau ənga hyi təwari mashi nyi, nahyi a'yi ənga pi wu hyi mai.

⁵⁴ Kalar ndëra sëmku kumër dza yau ənga ji təwari mashi də, a'yi ja ənga pi gëra kudau, ənga yu nda hya'ana nyi sara vir tau, ar pəcir kudiya duniya.

⁵⁵ Kumër dza yi dəfə jijiri ngau, ənga mashi də sər sa jijiri ngau.

⁵⁶ Kalar ndëra sëmku kumër dza yau ənga ju sa mashi də, ju nggya wu yau ənga nayi tsu wu ja.

⁵⁷ Ənggər këra Tada mbəmbədau səwa də, aya ja nga yi tsu ənga pi, agabangə kalar ndëra fiya də aga sər səm nyi, ju nda də a'yi ənga pi ba'anuwa aya yau.

⁵⁸ Najakə ngə macikəl këra shida sara dəməlmə a'yi ənggər këra əjiya əjir hyi'yar səm mai. Əjiya əjir hyi ndə səm sərə nju ngga ənga mana ba ndə tau, ama kalar ndëra wu səm najaka macikəl, a'yi ja ənga pi gëra kudau.”

⁵⁹ Yesu nana sə'yar kə patə ar pəci këra ja vər highiḃau wu umbwa daḃə dzə njir Yahudiya wu Kafarnahumu.

Zəmbəlma Yesu 'Yar Gangə Piyari Nu Nyi

⁶⁰ Ənggəra ndə nggari abangau, kə gangəu wu pama zəmbəlma nyi'yar na, “Dzadzau ngə highiḃə kau, wa ngu sən dləwuri najaka sa?”

⁶¹ Yesu ara ju səni wu dəfuwa ja abər zəmbəlma nyi'yar a vər ngwungwuni ar këra highiḃə kau, kə ji na anə nda, “Highiḃə kə ndzana huda hyi ya?”

⁶² Ya, abari nga hyu nda nggari wu dəfuwa hyi ma hyi lari Zər Ndau a vər sha a dar vira ja dədəma?

⁶³ Mambəl ngu lə pi, sə a'yi këra kumər dzə aga nyi mai. Ndər këra yi nar hyi kau, nə Mambəl ngau, ba ənga nə pi tsu.

⁶⁴ Ama alaga abangau, nji a'yi kəra gəra hənggəri.” Ara tsu kadəu, Yesu wu səni wu pama nda njira gəra hənggəri ənga ndəra wu nda thləna hya ja.

⁶⁵ Kə Yesu dumwa ji na anə nda, “Ca ngə səra də yi na anə hyi abər ndər sən shili əgya yau, a'yi mai, kəl ma Dədə nə nda lagu.”

⁶⁶ Ayukudə highiḅə kau, kə zəmbəlma nyi'yar gangəu sha ara ḅəra nu nyi.

⁶⁷ Kə Yesu yiwa zəmbəlma nyi'yar kumo apə məthlə kau, “Nahyi ma hyu yiwu hya sha ara nu də ya?”

⁶⁸ Kə Simanu Biturusu shadəwa nyi, ji na, “Thlagəu, a ndəra wa nga 'ya sən ma'ya? Nagə ngə ndəra ənga ndər nə lə pi gəra kudau.

⁶⁹ A hənggəri 'ya ənga a sən 'ya abər nagə ngə ndə Cici nə Hya.”

⁷⁰ Kə Yesu shadəwa nyi, ji na, “A'yi yi cadəbiya hyi kumo apə məthlə wa? Ama pathlə wu pama hyi shatan ngau.”

⁷¹ Ju ndər kə ar kəra Yahuda zər Simanu Isikarayoti, ara naja ngu nda thləna hya ja, kwalaga kə, pathlə ja wu pama nanda kə kumo apə məthlə kau.

7

Zaməya Yesu 'Yar A'yi Hənggəri Ənga Ja Mai

¹ Ayukudə kau, ngə Yesu ḅəra ḅəbiya ḅau wu 'yi'yir Galili, ara naji wu yiwu ja ma'yi a vu Yahudi mai, ara njir Yahudiya kəra a vuna wu gal lagur tsa nyi.

² Ama ar pæci kæra mini næ nggya wu kwapatə nə njir Yahudiya dər ləhəu,

³ kə zaməya Yesu 'yar na anə nyi, “A dər tsa'a ga piyari vi kə ga ma'yi a vu Yahudi, aga zəmbəlma ngə'yar kəra a vuna nda lari sə dədəgur'yar kəra gu məl.

⁴ Ndə a'yi kəra wu yiwu nja sənbiya nyi, ba ja nggya ar dəwa mai. Ta dā gu məl sə dədəgur'yar kau, ga cabiya kərngau anə njir duniya.”

⁵ Arya alaga zamə nyi'yar ənga kərnda a'yi hənggəri ənga ja mai.

⁶ Kə Yesu shadəwa nda, ji na, “Pəcir vu dā a'yi dā kwatahə mai, ama anə hyi kalar pæci a sən vu hyi.

⁷ Njir duniya wu piyari shishir dza hyi mai, ama nayi nga ndə piyari shishir dza yau, ara yu nar nda sər mēla nda dəmwa'yi nga nyi.

⁸ Nahyi, ma'ya mau a ndar vir mini kau. Nayi nədā nayi wu ma'yi kwatahə mai, ara pæci dā a'yi nyabiya dzə mai.”

⁹ Ayukudā Yesu nar nda abangau, ba ji bəra səkari wu 'yi'yir Galili.

¹⁰ Ama ayukudā zamə nyi'yar ma'yi a ndar vir mini, kə Yesu ma'yi tsu ama ar dəwa a'yi ar babal mai.

¹¹ Njir Yahudiya kəl gal nyi ar vir miniya nyi, ndu yiwa, ndu na, “Əmani nga ja?”

¹² Ar vir mini kau, nji kəl ndər wu pamə ar kəra Yesu ar dəwa. Əngwar alenyi nji, “Ndə mənəhə nga ja.”

Əngwar alenyi nji tsu, “Ndər ngguta vi nga ja.”

¹³ Ama ndər sən ndər ar kəra Yesu ar babal a'yi mai, ara ndu hivər njira nggurəm nə njir Yahudiya.

Yesu Highiḅau Ar Vir Mini

¹⁴ Ta nja vuri wu hathla mini, kə Yesu ma'yi a gwu Ki Hyal, ji gwa mbar highiḅau.

¹⁵ Kə sə kə ḁa sə dədəgur anə njir Yahudiya, ba ndə yiwa, “Lagu mani ngə ndə kə highiḅər sə'yar ka, ya, kəja naji uya highiḅə maya?”

¹⁶ Kə Yesu shadəwa nda, ji na, “Sə'yar kə ya vər highiḅə kau, a'yi nə kərḁa ngə mai, ama nə ndəra səwa ḁa ngau.

¹⁷ Kalar ndəra wu yiwu ja məl səra Hyal wu yiwu, ju nda sənbiya abər highiḅə ḁa sara ara Hyal nga nyi shili, ama a'yi nə kərḁa mai.

¹⁸ Njira wu ndər aga kərnda, thləmə nga ndu gal anə kərnda. Ama kalar ndəra wu ndər aga shili ənga dləvau anə ndəra səwa nyi, ndə jiri nga ja. Sə fati a'yi wu ja mai.

¹⁹ A'yi Musa ngə nə hyi dladə wa? Ama alaga ndə zəmə a'yi wu pama hyi kəra a vər bəlari mai. Mi ngə ḁa hyu gal tsa ḁa?”

²⁰ Əngwar nja nyi anə nyi, “Mambəl ḁəmwa 'yi pahəna liya gə ya? Wa ngu gal tsa nga?”

²¹ Kə Yesu shadəwa nda, ji na, “Nayau, yi məliya hyi sə dədəgur zəmə wacu, ya kəja hangəkala hyi a hya'ari.

²² Musa nə hyi dladəu ar kəra thla pəlzha (alaga kə a'yi naja ngə dzəguya mai, ama əjir hyi 'yar ngau). Kwalaga abangau kəja hya bəlmar dladə nyi lagur thla pəlzha anə zər Pəcir Bəlsar.

²³ Kabangəkau, a lar hyi abər a ḁar tsa'a nja thlana nyi pəlzha anə zər pəcir Bəlsar aga nja nyabiya dladə Musa ar kəra thla pəlzha. Ya, ara mi

ngə ɗa hyu ɗəfu ənga yi ara yi shiləgəbiya ndə valam pəcir Bəlsar ara?

²⁴ Hya piyari məl numa ga li ga li, ama hya məl numa kəra kakaləu.”

Yesu Ngə Kərsiti Ya?

²⁵ Ar pəci kə ngə njir Urshalima wu yiwa kərnda, “A'yi ndə kə nga nju gal aga tsa ta wa, əndəga?

²⁶ Ya kəja ja ənggau ju ndər ar babal, ya nandə wu na sə anə nyi mai. Njira nggurəmər nda ya, əndəga, a hənggəri nda abər naja ngə Kərsiti ya?

²⁷ Ama naja nə nyi mən wu səni vira ji shili sara ari, ama ar pəci kəra Kərsiti nə jiri wu nggura shili, ndər səni vira ju hya'ari sara ari a'yi mai.”

²⁸ Yesu tsu ja vər highiɗə wu ki Hyal, kə ji hya'ana ɗahəu, ji na, “Jijiri, hyu sən ɗa ənga vira yi hya'ari sara ari ya? Nayi shili ar kərɗa mai, ama ndəra səwa ɗa, ndə jijiri ngau, ama nahyi wu səni nyi mai.

²⁹ Ama nayi yiwu səni nyi ara nayi sara ara ja nga yau ənga naja ngə səwa ɗa.”

³⁰ Ənggəra Yesu nana ndər kau, kə ndə gal lagu kəra nda sən mbar nyi. Ama ndə a'yi kəra tsəkwari nyi mai, ara pəci nyi a'yi ɗa kwatahə mai.

³¹ Alaga abangau, nji gangəu wu pama nda hənggəri ənga ja. Əngwar alenyi nju pama nda, “Ma Kərsiti shili ya, ju sən sa məliya sə ɗədəgur a ndiya kəra ndə kə a vər məl kə ya?”

³² Ta njir Farisi nggari nja vər ndər tsətsəka'a ar kəra Yesu, ba pubu ɗədəgal'yar ənga njir Farisi səwa gaga nə Ki Hyal aga nda nda mbar Yesu.

³³ Kə Yesu nar nda, abər, “Pəcira ya daɓaga nggya əkkə'yi hyi a hyiri kushu, ba ya dzəgwa sha a ndəgya ndəra səwa ɗa a shili.

³⁴ Hyu nda gal ɗa, ama nahyi wu sən nər ɗa mai, ənga vira yu ma'yi a ndari nahyi wu sən ma'yi a ndəna mai.”

³⁵ Kə njir Yahudiya na wu pama nda, “Nəma ngə ndə kə wu yiwu ja ma'ya, kəra mən gəra nda lari nyi ka? Ju yiwu ja ma'yi a ndar 'yi'yi njir Gərikəu vira njir Yahudiya tətəlnakər a ndar ya? Aga tara ba ja nda highiɓə anə nda ya?

³⁶ Mi ngə ɗənga nyi ənga ndər ka, ‘Hyu nda gal ɗa, ama nahyi wu nər ɗa mai,’ ənga ‘Vira yu nda ma'yi a ndari, nahyi wu sən shili ari maya?’”

Yesu Ngə Mandəli Nə Lə Pi

³⁷ Ar jomər ndəla pəcir mini, kəra naja ngə pəci kəra ndiya ənga dəgaləu, Yesu hya'ari ji hya'ana ɗahəu, ji na, “Ma ndəra wu nggari hili, bəgə ja shili ja sa təwari 'yimi ara yau.

³⁸ Kalar ndəra hənggəri ənga yau, ənggər kəra nji tsəfəri wu ləkakadə Hyal, abər sara wu ta ja ngə mandəli 'yimir pi wu nda ndəla.”

³⁹ Ar pəci kəra ja vər ndər ar kəra mandəli nə lə pi kau, Mambəl Cici nga ja vər ndər ar kəri, Mambəl Cici kəra njira mbərsa wu nda dləwuri. Ar pəci kə Mambəl Cici a'yi shili kwatahə mai ara tsu kadakadarkur Yesu gəra cabiya dzau.

⁴⁰ Ənggəra nji nggari ndər Yesu, ba alenyi nji na, “Jijiri ndə kə naja ngə nabi ta mənə vir səkə ta.”

⁴¹ Alenyi nji tsu wu na, “Ndə kə naja ngə Kərsiti.” Əngwar alenyi nji tsu, “Lagu mani ngə Kərsiti a sən shili sara wu Galili ya?

⁴² Ləkakadə Hyal kəra tsətsəfə a'yi nar mən abər Kərsiti wu nda biya sara wu culi gə Dawuda wa? Ənga a'yi ji nar mən abər sara wu məlmə Bayitalahami nga ju biya, məlmə kəra Dawuda nggya a gwa gwa wa?”

⁴³ Kə miya nja nyi təkəbiya dzə arya Yesu.

⁴⁴ Alenyi nji ma ndu yiwu nda mbar nyi, ama ndə a'yi fər tsi ar dza ja mai.

Ghar Hənggəri Nə Njir Yahudiya

⁴⁵ Ayukuda nyi, kə njir bəla ki Hyal sha a ndəgya pubu dədəgal'yar ənga njir Farisi, njira səwa nda, ka yiwa nda, ndə na, “Mi ngə də nahyi shili ənga ja maya?”

⁴⁶ Kə njir bəla ki Hyal shadəwa nda, ndə na, “Ndə a'yi kəra saya ndərbəbiya ndər ənggər ndə kə mai!”

⁴⁷ Kə njir Farisi nar nyi anə njir bəla ki Hyal, “Patə əkkə'yi nahyi tsu nga ji nggutana kə ya?”

⁴⁸ A lar hyi njira nggurəm ənga njir Farisi kəra hənggəri ənga ja ya? Awau!

⁴⁹ Ama daḅər nji kəra gəra sən sə ar kəra dladə Musa, Hyal a shi'wuna ndar ja.”

⁵⁰ Nikodimosu, ndəra shili əgya Yesu tsu kadəu ənga tsu pathlə ja wu pama nda, yiwa,

⁵¹ “Mi ngə dladər mən na, a'yi kəl nji nggari wu miya ndəra nju vazau, səra ji məliya divira nja dzəgwa məlna nyi numa wa?”

⁵² Əngwar nda anə nyi, “Nagə ma ndər Galili ya? Tsambiya a vu ləkakadə nə Hyal, ba ga lari abər nabi a'yi kəra dla sara wu Galili mai.”

⁵³ Kə kalar ndə ma'yi a ndu ki nyi.

8

¹ Yesu ma'yi a dar mə nə wur Zayitunu.

² Kadə əmudlau kə Yesu bəra ma'yi a gwu ki Hyal. Nji gangə kaḅau a shili ara ja. A guna ba ji gwa uya vir nggya, ji dzəgwa highiḅə anə nji.

³ Kə maləmə dladə'yar ənga njir Farisi shili ənga mala kəra nji mbari nyi a vər məl səsukur. Ndə sa ta'yina nyi wu hada nda.

⁴ Kə ndə na anə Yesu, “Maləmə, mala kau, 'yi mbar nyi a vər məl səsukur.

⁵ Wu dladau, Musa nar 'ya, abər 'ya tsəya culi mala kə ənga tsəka vavaka. Mi nga gə na nə nga?”

⁶ Ndu məl thlər ənga najaka yiwa sə aga nda nggəya nyi ləbam. Ndu yiwu aga nda uya lagu kəra nda sən vazəya nyi ari.

Ama kə Yesu uzha gya, ba ji mbari tsəfə sə ənga tsa ja a gyiwu 'yi.

⁷ Ənggəra ndə dumwa ənga yiwa Yesu, ba ji hya'ari ji na anə nda, “Ma ndə a'yi kəra gəra ənga bikau wu pama hyi, bəgə ja dzəguya vaka nyi ənga tsəka.”

⁸ Kə Yesu bəra uzha gya, ba ji bəra dumwa ənga tsəfə sə a gyiwu 'yi.

⁹ Ənggəra ndə nggari abangau, ba ndə dzəguya ma'yi zəməu, mbari ar njira nggurəm ba'anə nji kukushu. Ənggau, ba ndə piyari Yesu zhizhi nyi ənga mala kə ta'yu wu mwa nyi a ndəna.

¹⁰ Kə Yesu hya'ari a'yi ta'yau, kə ji yiwa nyi, ji na, “Mala, əmani nga nda? Ndə a'yi kəra məliya ngə numa wa?”

¹¹ Kə ji shadəwa nyi, ji na, “Maləmə ndə a'yi mai.”

Kə Yesu na anə nyi, “Alaga nayi ma sə a'yi yu na anə ngə mai. Ma'yi sə ngau, ama ga sara dumwa ənga məl bikə mai.”

Yesu Ngə Mbəmbəl Nə Duniya

¹² Ar pəci kəra Yesu bəra ndər anə nja nyi, kə ji na, “Nayi ngə mbəmbəl nə duniya. Kalar ndəra wu nu də, naji wu bə wu kuthlə mai, ama ju uya mbəmbəl nə pi.”

¹³ Kə njir Farisi nar nyi anə Yesu, “Gə wu lə sakida ar kəra kərngau, sakida ngau a sən də ənga jiri mai.”

¹⁴ Kə Yesu shadəwa nda, ji na, “Alaga yi lər sakida ar kəra kərda, sakida də jiri nga nyi, ara yu səni vira yi hya'ari sara ndari ənga vira yu ma'yi a ndari. Ama nahyi wu səni vira yi shili sara ndari ənga vira yu ma'yi a ndari mai.

¹⁵ Numar hyi nə ndəndəkur, ama nə də a'yi abangə mai.

¹⁶ Ama alaga yu məl numa, numa də jiri nga nyi, ara nayi a'yi zhizhi də mai, ama ndəra səwa də a'yi ja ənga yau.

¹⁷ Əngwar dladər hyi, ma nji məthlə lər sakida ar kəra sau, sa nyi a dər jiri.

¹⁸ Yu lə sakida ar kəra kərda. Dəda kəra səwa də tsu naja ngə nə məthləkura nyi.”

¹⁹ Kə ndə yiwa nyi, ndə na, “Əmani ngə dənga?”

Əngwar Yesu anə nda, “Nahyu sən də ənga Dəda mai, maja abər hyu sən də, a sənər hyi Dəda tsu.”

²⁰ Yesu nana ndər kə ar pəci kəra ja vər highiəu a vu ki Hyal ləhəu ar vir dəwa gəna kəra nji tsəmiya ari. Ndə a'yi kəra mbari nyi tsu mai ara pəci nyi a'yi də kwatahə mai.

21 Kə Yesu ɓəra na anə nda, “Kəja yu ma'yi sə ɗa, ənga hyu nda gal ɗa, ba hya tə wu bikər hyi. Vira yu ma'yi a ndari, nahyi wu sən ndari mai.”

22 Ba sə kə məliya njira nggurəm nə Yahudiya wu yiwa kərnda, “Ju nda tsəya kərnyi ya? Ca ngə məliya ju na, ‘Vira yu ma'yi a ndari nahyi wu sən nda mai kə ya?’”

23 Ama kə Yesu ɓəra dumwa, ji na, “Nahyi sara gyiwu 'yi ngau, nayi tsu sara a dəməlmau. Nahyi nə duniya ngau, ama nayi a'yi nə duniya mai.

24 Ca ngə sərə ɗa yi na anə hyi, hyu nda tə wu bikər hyi. Ara ma nahyi a'yi hənggəri ənga sərə yi na ar kəra kərɗa kə mai, ənga jiri hyu nda tə wu bikər hyi.”

25 Kə ndə yiwa nyi, “Wa nga ga?”

Əngwar Yesu anə nda, “Kakalə ənggər kəra yi nar hyi tsu kadə ta.”

26 Sə a'yi gangəu kəra yu sən na ar kəra hyi nə məl numa. Yu nar nyi anə nji sərə ndəra səwa ɗa wu na anə ɗa zhizhi nyi, ənga tsu sərə ju na jiri nga nyi.

27 Nandə nggabiya abər ar kəra Dənyi nga ju ndər anə nda mai.

28 Ca ngə sərə məliya Yesu nar nda, abər, “Ar pəci kəra hyu nda hari Zər Ndau a di, ar pəci ta nga hyu nda nggabiya abər nayi ndəra yu na, nayi ngau. Nayi tsu yu məl sə kərɗa mai, ama yu highiɓə sərə Dəɗa highiɓər ɗa.

29 Ndəra səwa ɗa a'yi ja ənga yau, naji piyari ɗa zhizhi ɗa mai, ara cumu yu məl sərə wu pina huda ja.”

30 Ar pəci kəra Yesu nana sə'yar kau, nji gangəu hənggəri ənga ja.

Jirkur Kəra Wu Məliya Ndə Kambau

³¹ Kə Yesu nar nyi anə njir Yahudiya kəra hənggəri ənga ja, “Ma hyi dumwa ənga səbə highiḃə ḃa ənga jiri, nahyi ngə zəmbəlma ḃa'yar nə jijiri.

³² Hyu nda sənbiya jiri, jira nyi tsu wu nda pəlna hyi.”

³³ Kə ndə shadəwa nyi, ndə na, “Na'ya culi gə Ibrahimu ngau, na'ya sara vər ḃa mafa ndə mai. Ya, mi ngə ḃa gu na, ba nja pəlna 'ya?”

³⁴ Kə Yesu shadəwa nda, ji na, “Jijiri nga yu na anə hyi, kalar ndər məl bikau, mafa bikə nga ja.

³⁵ Mafa a'yi wu sən ḃa zər ki parangə mai, ama zər kəra nji ya wu ki, zər kiya nyi nga ja ba'anuwa.

³⁶ Ma sən ḃa ba Zəra nyi pəlna hyi, a ḃar hyi pəpəl ənga jiri.

³⁷ Wu sən yi abər nahyi culi gə Ibrahimu ngau, ama kəja hyu gal lagur tsa ḃa, ara vir fiya ndər ḃa a'yi wu ḃəfuwa hyi mai.

³⁸ Yu na anə hyi sərə yi lari ara Dəḃa, ama nahyi, hyu məl sərə hyi nggari ara dərhyi.”

³⁹ Kə ndə shadəwa nyi, ndə na, “Ibrahimu ngə dər'ya.”

Kə Yesu shadəwa nda, ji na, “Maja abər wazha Ibrahimu nga hyi, a mələr hyi sərə Ibrahimu məlna.

⁴⁰ Nayi ndə ngau, ndər na sərə jiri kəra yu nggari sara ara Hyal, ama kəja hyu yiwu hya tsəya ḃa. Ya, kəja Ibrahimu a'yi məl culi sə ənggər kə mai.

⁴¹ Sərə dərhyi məlna ca nga hya vər məl.”

Ama kə njir Yahudiya na, “Na'ya a'yi wazha mandzagwa mai, tada kəra ara 'ya Hyal nga kərnyi wacu.”

Wazha Shatan

⁴² Əngwar Yesu anə nda, “Maja abər Hyal ngə dərhyi, hyu cabiya da yiwukur, ara yi shili sara ara Hyal. Ya kəja yi ənggau, nayi shili ar kərda mai, ama naja ngə səwa da.

⁴³ Ara mi nga hyi gəra nggabiya ndər da? Ara nahyi a'yi wu nggari səra yu na mai.

⁴⁴ Nahyi nə dərhyi shatan ngau, ənga hyu yiwu hya məl səra dərhyi wu yiwu. Tsu mudlau naja ndər tsa ndə nga ja, ənga naji wu səbə jiri mai, arya jiri a'yi wu ja mai. Ar pəci kəra ji thlar fati, miya gə nda nga ji nana, ara naja ndər thla fati ngau, ənga dəya fati.

⁴⁵ Ama ara ma yi nar hyi jiri, nahyi wu hənggəri ənga yi mai!

⁴⁶ Wu pama hyi ya, wa ndəra wu sən vazəya da ənga bika? Ma yi nar hyi jiri, mi ngu da nahyi wu hənggəri ənga yi maya?

⁴⁷ Kalar ndəra nə Hyal ngau, ju səhimi səra Hyal wu na. Səra da nahyi wu səhimi nyi mai, ara nahyi a'yi nə Hyal mai.”

Yesu Dəgal A Mwara Ibrahimu

⁴⁸ Njir Yahudiya shadəwa nyi, ndə na, “A'yi jiri ənga 'ya, ənggəra 'yi na abər nagə ndər Samariya kəra nyinyau ənga mambəl dəmwa'yi wa?”

⁴⁹ Əngwar Yesu anə nda, “Nayi a'yi yi ənga mambəl dəmwa'yi mai. Yu ha kəra Dədə, ama nahyi wu ha kəra yi mai.

⁵⁰ Nayi ngu gal fal anə kərda mai, ama ndə a'yi kəra wu gal anə da, naja ngə ndər məl numa.

⁵¹ Jijiri ənga yu na anə hyi, ma ndəra səbiya ndər da, naji wu tə mai.”

⁵² Ar kəra ndər kau, əngwar njir Yahudiya anə nyi, “Kabangəkə ja, a sən 'ya abər nagə a'yi gə ənga mambəl dəmwə'yu! Ibrahimu ənga kərnyī a təri ja ba nabi'yar paməpamə tsu, ama əngwar gau, ‘Kalar ndəra wu hənggəri ənga ndər də naji wu tə mai.’

⁵³ Naga ndiya dər'ya Ibrahimu ya? Naja ma a tər ja ənga tsu abəngau ngə nabi'yar. Ma gə nggani wa nga ga?”

⁵⁴ Əngwar Yesu, “Ma yu lə kadakadarkur anə kərda, kadakadarkur də a'yi ar viya vanyi sə mai. Dəda, kəra hyu na abər Hyalər hyi ngau, naja ngu lə kadakadarkur anə da.

⁵⁵ Kwalaga kə nahyi wu sən nyi mai kau, nayau, yu sən nyi. Ma yi na, nayi wu sən nyi mai, a dər yi ndər thla fati ənggər nahyi. Ama nayau, yu sən nyi ənga yu bəlar ndər nyi.

⁵⁶ Dərhyi Ibrahimu a cagulir ja gagadau aga ja lari pəci da, a lar ja ənga hudə pipida gagadau.”

⁵⁷ Əngwar njir Yahudiya anə nyi, “Nagə ndəra gəra kar fa təfukumunyi, gu na abər a lar gə Ibrahimu ya?”

⁵⁸ Əngwar Yesu, “Jijiri nga yu na anə hyi, kadivira nja ya Ibrahimu a'yi yau.”

⁵⁹ Ənggəra ndə nggar ndər kau, ba ndə dədəməri tsəka ndu yiwu nda vavəkəya nyi, ama kə Yesu gwadənəkər. Ba ji biya sara wu ki Hyal.

9

Yesu Pahəna Liya Ndəra Nji Yabiya Ləfau

¹ Ənggəra Yesu a vər tərabiya, kə ji lari vanyi ndə kəra nji yabiya nyi ləfau.

² Kə zəmbəlma nyi'yar yiwa nyi, “Maləmə, bikə wa ngə məliya nji yabiya ndə kə ləfa? Bikə nyi əndəga nə njir ya nyi ya?”

³ Kə Yesu shadəwa nda, “A'yi bikə nyi mai ənga a'yi bikə njir ya nyi tsu mai, ama sə kə darkər aga dənəma nə Hyal a cabiya kər wu nggyabiya nyi.

⁴ A dāri tsa'a mənə dumwa ənga məl thlər nə ndəra səwa də, ma tsu puci, ara vu'yi wu shili, kəra ndə a'yi kəra sən məl thlər mai.

⁵ Ma tsu yi a'yi wu duniya, nayi ngə mbəmbəl nə duniya.”

⁶ Ayukudə ji nana abangau, kə ji təfər tuli a gyiwu 'yi, ba ji dzəguri 'yi'ya nyi, ba ji təbəri, ji bəsiya ar liya nda nyi.

⁷ Əngwar ja anə nda nyi, “Ma'yi ga gwa cina bama gau a gu fa'a Səliwamu.” (Ca ngə Səsau). Kə ndə kə ma'yi ji gwa cina bama ja, kə ji sha shili ju lar sau.

⁸ Kə təwul nyi'yar ənga njira tsəliya lari nyi a vər kədi dədəməu, na, “A'yi ndə kə ngu nggya ənggau, ju kədi ta wa?”

⁹ Əngwar alenyi nji, “Naja ngau.”

Əngwar alenyi nji tsu, “Awau, ndər pa nyi ngau.”

Ama, naja ənga kərnyi dumwa ənga na, “Nayi ngau pakatəu!”

¹⁰ Kə ndə yiwa nyi, ndə na, “Ya, lagu mani ngə liya gə kə paha?”

¹¹ Əngwar ja, “Ndə kə nju ngga ənga Yesu kau, ngə dzəgur 'yi'yi ənga tuli, kə ji bəsiya ar liya yau. Kə ji na anə də, ‘Ma'yi a gu fa'a Səliwamu ga gwa cina bama gau.’ Ba yi ma'yi, yi gwa cina bama, ba yi lar sau.”

¹² Əngwar nda anə nyi, “Əmani ngə ndə ka?”

Əngwar ja, “Nayi wu səni mai.”

Njir Farisi Yiwabiya

Lagu Kəra Ndə Kə Uya Lar Sau

¹³ Kə ndə həri ndəra nji yabiya ləfə ta a ndəra njir Farisi.

¹⁴ Arya pəcir Bəlsar ngə Yesu təfər tuli kəra ji dzəgur 'yi'yi əni, kə ji pahəna liya ndə kau.

¹⁵ Agabangau, kə njir Farisi tsu yiwa nyi, lagu kəra ji uya, ju lar sau. Əngwar ja anə nda, “Ji bəsiya tsəkwabə kəra ji dzəguri ar liya yau. Yi ma'yi yi gwa cina bama yau, ba yi lar sau.”

¹⁶ Əngwar alenyi njir Farisi, “Ndə kə a'yi sara ara Hyal mai, arya naji wu bəla pəcir Bəlsar mai.”

Ama alenyi nju na, “Abari ngə ndər bikau a sən məliya najaka sə dədəgura?” Kə ndə təkəbiya dzau.

¹⁷ Kə ndə bəra shabiya dzə a ndəgya ndə ləfə ta, ndə na, “Mi səra gu na ar kəra ndə ka, kəja liya gə nga ji pahəna?”

Əngwar nda nyi, “Naja nabi ngau.”

¹⁸ Njira nggurəm nə Yahudiya, a'yi hənggəri abər ndə kə dədəmə ləfə nga ja mai, kəl ta ndə səwa nja nggar nda njir ya nyi.

¹⁹ Ndə sa yiwa nda, “Zər hyi ngə ndə kə ya? Naja nga hyi na nji ya nyi ləfə ta ya? Ya, lagu mani nga ju lar sə kabangəkə ka?”

²⁰ Əngwar njir ya nyi anə nda, “Yi wu səni abər zər 'ya ngau, ləfə nga nji ya nyi.

²¹ Ama ənggəra ju lar sə kabangəkəu, ənga tara wa ngə pahəna liya ja, na'yu səni mai. Yiwa nya mau, fa nyi a kari aga ja ndər ənga kərnyi.”

²² Njir ya nyi ndər abangau ara hivər njira nggurəm nə Yahudiya, ara ndə mbiya miya abər

kalar ndəra hənggəri abər Yesu ngə Kərsiti, ba nja kədləbiya nyi sara wu vir dəfə dzə njir Yahudiya.

²³ Ca ngə sərə də njir ya nyi na, “Fa nyi a kari, hya yiwa nyi.”

²⁴ Kə ndə bəra ngga ndəra nji yabiya ləfau nə məthləkura nyi, ndə na anə nyi, “Nana sərə jiri wu mwar Hyal. Na'ya 'yi wu səni abər ndə kau, ndər bikə ngau.”

²⁵ Kə ji shadəwa, ji na, “Tara ndər bikə nga ja ənga ndər bikə nga ja mai, nayi wu səni mai. Sərə yu səni ca ngə dədəmə ləfə nga yau, ama kabəngəkə yu lar sau.”

²⁶ Kə ndə bəra yiwa nyi, ndə na, “Mi nga ji məliya nga? Lagu mani nga ji pahəna liya ga?”

²⁷ Kə ji shadəwa nda, ji na, “A nar hyir yi tsu kadəu, ama nahyi səhimi mai. Mi ngə də hyu bəra yiwa də? Hyu yiwu hya də zəmbəlma nyi'yar ətsu ya?”

²⁸ Kə ndə nggənggəlma nyi, ndə na, “Nagə ngə zəmbəlma nyi sə ngau, ama na'ya zəmbəlma Musa nga 'ya.

²⁹ Wu sən 'ya abər Hyal ndər ənga Musa, ama ndə kau, na'yu səni vira ji shili sara ndari mai.”

³⁰ Kə ji shadəwa nda, ji na, “Kəja mə sə dədəgur ja! Nahyi səni vira ji shili sara ndari mai, ama kəja ja pahənar liya yau!

³¹ Namən wu səni abər Hyal a'yi wu nggari kədi nə njir bikə mai. Ama ju səhimi kədi nə njira wu dləvə nyi ənga ndu məl sərə ju yiwu nda məl.

³² Mbar dzəgwar duniya, ndə a'yi kəra saya nggari abər nji pahəna liya ndəra nji ya nyi ləfə mai.

³³ Ma ndə kə a'yi sara ara Hyal mai, sə a'yi ju sən məliya mai.”

³⁴ Kə ndə shadəwa nyi, ndə na, “Nagə ndəra nji yabiya wu bikau, gu yiwu ga highiɔau anə 'ya?” Ba ndə kədləbiya nyi a biya sara wu umbwa daɓə dzə njir Yahudiya.

Ləfəkur Nə Mambəl

³⁵ Yesu nggari abər ndə kədləbiya nda nyi a biya. Ba ji thləwa nyi, ji yiwa nyi, “A hənggər gə ənga Zər Ndə ya?”

³⁶ Əngwar nda nyi anə nyi, “Wa nga ja, Maləmə? Nar da aga ya hənggər ənga ja.”

³⁷ Kə Yesu shadəwa nyi, “A lar nyir gau, naja nga vər ndər ənga gə kau.”

³⁸ Kə ndə kə na, “Thlagəu, a hənggər yau,” ba ji dləvə nyi.

³⁹ Əngwar Yesu anə nyi, “Aga numa nga yi shili wu duniya, aga njira ləfau nda lar sau ənga njira wu nggani ndu lar sə tsu nda da ləfau.”

⁴⁰ Ənggəra aleniyi njir Farisi kəra ənga ja nggari abangau, kə ndə na anə nyi, “Mi? Gu yiwu ga na abər na'ya ma, nji ləfə ya?”

⁴¹ Əngwar Yesu anə nda, “Maja abər ləfə nga hyi wacu, nahyi a'yi ənga bikə mai. Ama ta hyi na abər hyu lar sau, ca ngə da bikər hyi a nggyari ənga hyi.

10

Karapau Ar Kəra Ndər Bəla

Ənga Dləma Təmahəu

¹ “Jiri nga yu na anə hyi, kalar ndəra a'yi vu dləma lagu miyar gwa nyi mai, ama ji vu lagu ya dləma, naja ndər həl ngau ənga ndər da lagu.

² Ndëra vu lagu miyar gwa në dlëma, naja ngë ndër bëla tëmahëu.

³ Ndër bëla dlëma wu pahëna nyi miyar gwa në dlëma, ba ja vwau. Tëmahë tsu ndu sëya nyi himi. Ju ngga tëmahë nyi ënga thlëmër nda, ba ja lëbiya nda a biya.

⁴ Ayukudä ji fa'abiya tëmahë nyi a biya patëu, ba ja ma'yi a dumwar nda, ba tëmahë nyi a nu nyi ara ndu sën dëha ja.

⁵ Ama nandë wu nu mëthlëpi mai, kël ma, nda hwi ara ja, ara nandë wu sën dëha mëthlëpi mai.”

⁶ Yesu nar nda najaka karapau, ama nandë ng-gabiya sëra ju na anë nda mai.

Yesu Ndër Bëla Mënahëu

⁷ Agabangau, kë Yesu bëra na anë nda, “Yi wu nar hyi jirkura nyi, nayi ngë miya lagu vu dlëma tëmahëu.

⁸ Patër njira dla divira yi shili, njir hël ënga njir dë lagu ngau, ama tëmahë a'yi sëya nda himi mai.

⁹ Nayi ngë miya lagu vu dlëma, kalar ndëra vu lagu dë ju uya mbëdau. Ju vwau ënga ju biya, ba ja biya uya vir sëm sër sëm.

¹⁰ Ndër hël wu shili wacu aga sa hël ënga sa tsa ba aga sa ndza sau. Ama nayi yi shili aga nda uya pi, pi këra nyinyi gagadäu.

¹¹ “Nayi ngë ndër bëla këra mënahëu. Ndër bëla këra mënahëu wu lër piya ja arya tëmahë nyi.

¹² Ndëra nji hëri aga bëla, naja a'yi thlagër tëmahë mai. Ma ji lari ufwar vuwa a vër shili, ba ja hwinakër ja piyari nda. Ba ufwar vuwa kakathlër tëmahëu ba ja tëtëlna këra nda.

¹³ Ndëra nji hër kau, ju hwinakër ara tëmahë a'yi nè nyi mai, ënga tsu dza'wu nyi a'yi ënga nda mai.

¹⁴ “Nayi ngë ndër bëla këra mënahëu, yu sën tëmahë dë ënga tëmahë dë wu sën dë tsu.

¹⁵ Kakalë änggër këra Dëdë wu sën dë, nayi tsu yu sën Dëdë. Nayi tsu yu lëri piya yau, aya tëmahë dë.

¹⁶ A'yi yi ënga alenyi tëmahë këra a'yi nda wu dlëma kë mai. Kël ya shili ënga nda tsu. Nanda ma ndu nda sëhimi sëra yu na, ënga ndu dë tsakë'yi zëmëu ënga ndër bëla zëmë pir.

¹⁷ Sëra dë Dëdë wu yiwu dë ngau, ara yu lër piya yau, aga ya bëra shabiya nyi a shili wayu.

¹⁸ Ndër sën hëbiya piya yi a'yi mai, kël nayi nga sën lër së dë. Dënama nè lëri ënga shabiya nyi a shili a'yi ara yau. Dladë këra Dëdë lëri anë dë ngau.”

¹⁹ Aya ndër kë ngë njir Yahudiya bëra tëkëbiya dzë wayu.

²⁰ Nji gangëu wu pama nda wu na, abër, “Naja ënga mambël dëmwa'yu, ënga ju thlëkau. Mi ngë dë hyu sëya nyi himiya?”

²¹ Ama ängwar alenyi nji, “Ndër kë a'yi ndër nè ndëra ënga mambël dëmwa'yi ngë mai. Ndëra ënga mambël dëmwa'yi a sën pahëna liya ndë lëfë ya?”

*Njir Yahudiya Nggël Ara Hënggëri
Ənga Yesu*

²² Kë pëcir mini nè fë barka ar këra Ki Hyal shili, a vu Urshalima. Ar pëcir fwahëu ngë səkë dërkër.

²³ A gwu Ki Hyal kau, Yesu a vër bëbëu ar vira nju ngga ënga dalabagëu nè Solomanu.

²⁴ Kë njir Yahudiya këra zëwari nyi na, “Ba'anuwä nga gu piyari 'ya wu kuthla? Ma nagë ngë Kërsiti nar 'ya ar babal.”

²⁵ Kə Yesu shadəwa nda, ji na, “A nar hyir yau, ama nahyi hənggər nə mai. Sə dədəgur kəra ya vər məl wu thləmə Dədə nga vər ndər ar kəra yau.

²⁶ Ama nahyi hənggər əni mai ara nahyi a'yi hyi təmahə də mai.

²⁷ Təmahə də ndu səhimi dəha yau. Yu sən nda ənga ndu nu də.

²⁸ Yu nə nda pi gəra kudau, ənga nandə wu sa mai. Ndər sən mbəliya nda sara wu tsa yi a'yi tsu mai.

²⁹ Dədə kəra nə də nda a ndiyar kalar ndə ənga dəgaləu. Ndər sən mbəliya nda sara wu tsa ja a'yi mai.

³⁰ Nayi ənga Dədə nji zəmə nga 'ya.”

³¹ Kə njir Yahudiya bəra fa'ari tsəka aga nda tsəya nyi ənga tsəka vavaka.

³² Kə Yesu na anə nda, “A canə hyir yi sə dədəgur gangə gagađau sara ara Dədə, arya mani wu pama nda nga hyu gal tsa də ənga tsəka vavaka ka?”

³³ Əngwar njir Yahudiya anə nyi, “Na'yu gal tsa ngau ənga tsəka vavaka arya sə mənəhəu kəra gə məl na kə mai, ama arya ndər nə dida Hyal kəra gu na. Nagə ndə ngə wacu, ama gu yiwu ga kakalər kərngau ənga Hyal.”

³⁴ Yesu shadəwa nda, ji na, “A'yi tsətsəfə nga nyi wu dladər hyi, abər Hyal na, ‘Nayi na, nahyi hyal'yar ngə' wa?

³⁵ Wu sən mən abər ndər tsətsəfə nə Hyal wu thla fati mai. Ma Thlagə na abər njira dləwuri ndər nyi ‘hyal'yar nga nda,’

³⁶ ara mi nga hyu də də abər yi ndər nə dida Hyal, arya yi na, ‘Zər Hyal nga ya’? Nayi ndəra Tada cadəbiya, aga ja səwa də a shili wu duniya.

³⁷ Ma a'yi səra Dəda wu məl nga yu məl mai, hya sara hənggəri ənga yi mai.

³⁸ Ama ma səra Dəda wu məl nga yu məl, alaga nahyi gəra hənggəri ənga yau, hya hənggəri ənga sə dədəgur kəra yu məl. Lagu kau, nga hyu səni ənga nggabiya abər Dəda wu yau ənga nayi wu Dəda.”

³⁹ Kə ndə bəra nərdəu aga nda mbar Yesu, ama kə ji mbəliya dzə sara wu tsa nda.

⁴⁰ Kə Yesu bəra sha a biyar ya dəl Urdənu, a biyar vira Yahwana dzəguya məl bəbətizəma ari. A ndəna nga ji nda nggya.

⁴¹ Kə nji gangəu nu nyi a shili. Kə ndə dumwa ənga na, “Alaga kə Yahwana a'yi saya məliya sə dədəgur kə mai kau, ama kalar səra ji nana ar kəra ndə kə jiri nga nyi patəu.”

⁴² Ar vi kə tsu ngə nji gangə hənggəri ənga Yesu.

11

Tər Liyazaru

¹ Vanyi ndə a'yi kəra nja ngga ənga Liyazaru kəra da gəra ngga. Naja sara wu məlmə Bethlani, məlmə gə Maryamu ənga kwamə nyi Marthla.

² Maryamu kau, kəra zamə nyi Liyazaru gəra ngga kau, naja ngə saya pənggər nyi mal kisə anə Thlagə ənga ji bəsiya hya ja ənga shishir kəra ja.

³ Kə kwamə nyi'yar səwa nyi cama anə Yesu, ndə na, “Thlagəu, ndə ta gu yiwu ta a'yi ngga mai.”

⁴ Ənggəra Yesu nggari abəngəu, ba ji na, “Shiləgə kə wu tsəya nyi mai, ama aga ja shili ənga kadakadarkur anə Hyal ənga anə Zər nyi.”

⁵ Ara yiwu dzə a'yi ara Yesu anə Maryamu ənga Marthla ba zamər nda Liyazaru.

⁶ Ama alaga abangau ta ji nggari abər Liyazaru a'yi ngga mai, kə ji bəra nggya nə pida məthlə ar vi ta.

⁷ Kə ji dzəgwa na anə zəmbəlma nyi'yar, “Bəgə mənə bəra sha a vu 'yi'yir Yahudi.”

⁸ Kə zəmbəlma nyi'yar na anə nyi, “Maləmə, a'yi bəliya sar mai ngə njir Yahudiya wu gal nda tsi ngau ənga tsəka vavaka, ya, ga bəra yiwu ga sha a vuna tsu ya?”

⁹ Kə Yesu shadəwa nda, “A'yi saka kumo apə məthlə ngu pəkə wa? Ndə a sən thlər hi əpuci ma ju bə mai, ara ju lar sə camə ara mbəmbəl nə pəci.

¹⁰ Kəl ma ji bə əvu'yi nga ju thlər hi, ara mbəmbəl a'yi mai.”

¹¹ Ayukudə Yesu nana ndər'yar kau, ba ji dumwa ji na, “Bazhir mən Liyazaru a gwari wu ghanyi, ama ma'yi nga yi aga ya nda hyabiya nyi sara wu ghanyi.”

¹² Əngwar zəmbəlma nyi'yar anə nyi, “Thlagəu, ma ju ghanyi, ju nda də jaməu.”

¹³ Səra Yesu wu na abər Liyazaru a təri, ama ma zəmbəlma nyi'yar wu nggani ghanyi nə bəlsar nga ja a gwa.

¹⁴ Kə ji dzəgwa nar nda ar babal, abər, “Liyazaru a təri.

¹⁵ Nyinyi nga yi ənga hudə pipida arya a'yi yi a ndəna mai, aga hya mbərsa. Ama bəgə mənə ma'yi a ndəgya ja.”

¹⁶ Kə Toma, ndəra nju ngga ənga bili, nar nyi anə alenyi zəmbəlma'yar, “Bəgə mənə ma'yi mənə vuwa tə ənga ja.”

*Yesu Fiya Nyi Dəfu Anə Maryamu
Ənga Marthla*

17 Ənggəra Yesu shili, ba ji sa nggari abər Liyazaru a pidar ja fodə wu hu.

18 Bethlani ləhə nga ja wu dzər Urshalima, a'yi kari miyal məthlə mai.

19 Njir Yahudiya gangəu ngə shili aga nda sa pəlna pəli anə Marthla ənga kwamə nyi Maryamu arya tər zamər nda Liyazaru.

20 Ənggəra Marthla nggari abər Yesu a vər shili, ba ji ma'yi, ji biya dləwuri nyi, ama Maryamu nə nyi, ba ji nggya wu ki.

21 Kə Marthla nar nyi anə Yesu, “Thlagəu, ma ja abər gə nda da a'yi ənggau, zamə da a'yi tə mai.

22 Alaga kabangəkau, yu səni, abər, Hyal wu sən nə ngau səra gu kədi ara ja.”

23 Əngwar Yesu anə nyi, “Zamə ngau wu bəra hya'ari.”

24 “Angə,” kə Marthla shadəwa nyi, “A sən yi ju nda hya'ari ma nji tətəu, wu nda hya'ari ar kudiyar duniya.”

25 Əngwar Yesu anə nyi, “Nayi ngə hya'ari sara vir tau ənga nayi ngə pi. Kalar ndəra hənggəri ənga yau, ju bəra da a'yi ənga pi alaga ji tau.

26 Ndəra a'yi ənga pi wu yau, ənga ji hənggəri ənga yau, naji wu tə mai. Marthla, a hənggəri gə abangə ya?”

27 Marthla shadəwa nyi, ji na, “Angə, Thlagəu, a hənggəri yi abər nagə ngə Kərsiti, Zər Hyal kəra a vər shili wu duniya.”

28 Ayukuda ji nana abangau, ba ji ma'yi a vu ki, ji vuwa nggar kwamə nyi Maryamu, ji na anə nyi ar dəwa, “Kəja Maləmə a biya ja vər yiwa ngau.”

29 Ənggəra Maryamu nggari abangau, ba ji hya'ari ənga kusa, ji ma'yi a ndəra ja.

30 Ar pəci kau, tsu Yesu gəra vu huda məlmau, tsu ja ar vira Marthla thləwa nyi ar ta.

31 Ənggəra njir Yahudiya kəra a vu ki ənga Maryamu ndu fə dəfu anə nyi lari ənggəra ji biya ənga kusa, ba ndə nu nyi a biya ma ndu nggani ndar hu nga ja aga nda tiwi a ndəna.

32 Ənggəra Maryamu biya thləwa vira Yesu ari, ba ji dla wu mwa nyi, ji na, “Thlagəu, ma ja abər gə nda da a'yi ənggau, zamə da a'yi tə mai.”

33 Ənggəra Yesu lari nyi a vər tiwi ənga njir Yahudiya kəra shili ənga ja vər tiwi tsu, kə sə kə tə Yesu wu dəfuwa ja gagaɖau.

34 Əngwar ja, “Əmani, nga hyi haɖəna nya?”

Əngwar nda anə nyi, “Thlagəu, a ndə ga sa lari.”

35 Kə Yesu pəna sələm.

36 Agabangau, kə njir Yahudiya na, “Lara mau ənggəra ju yiwu nyi!”

37 Ama kə alenyi nju pama nda na, “Naja ndəra pahəna liya ndə ləfə ta, a'yi ja ənga dənəma nə kar nyi ara tə wa?”

Yesu Hya'ana Liyazaru Sara Vir Tau

38 Kə sə kə da tədəbə anə Yesu wu dəfuwa ja, kə ji ɓar dzə a ndar huwa nyi. Hu kau, thləl ngau a vu mau, kəra nji haɖiya miya nyi ənga tsəka dəgaləu.

39 Əngwar Yesu, “Həna mə tsəka kau.”

Əngwar Marthla kwamiya ndə tətə anə nyi, “Ama Thlagəu, kabangəkə ju shuni kərakəraməu ara a məliyar ja pida fodə wu hu kau.”

⁴⁰ Kə Yesu na anə nyi, “A'yi yi nar ngau abər ma gə mbərsa, gu lari kadakadarkur nə Hyal wa?”

⁴¹ Kə ndə həna tsəka nyi. Kə Yesu tsamə dəməlmau, kə ji na, “Tada, yu usaku ngau ara a nggar dər gau.

⁴² Wu sən yi abər gu nggar dər cumu, ama yi na abangau aga nji kə tata'yi wu dzə dər kau, nda hənggəri abər nagə ngə səwa dər.”

⁴³ Ənggərə ji nana abangau, kə Yesu hya'ana dərəu, ji ngga, “Liyazaru, bə səbiya!”

⁴⁴ Kə ndə tətə nyi səbiya, tsa ja ənga hya ja mbamba ənga pa'wa hədə ndau, bə pa'wa kərə zəwar bama ja.

Kə Yesu na anə nda, “Pəlna nya mau, ja ma'yi sə nyi.”

Mba Miya Aga Tsa Yesu

⁴⁵ Arya sə kə dər kau, njir Yahudiya gangəu kərə shili əgya Maryamu lari sə kə Yesu məlna kau, bə ndə fuwa mbərsar nda wu ja.

⁴⁶ Ama kə alenyi nju pama nda ma'yi a ndəgya njir Farisi, ndə nda nar nda sərə Yesu məliya.

⁴⁷ Agabangau, kə pubu dədəgal 'yar ənga njir Farisi nggəya dəbə nə njir pathla.

Əngwar nda, “Mi nga mənə vər məla? Kəja ndə kau, kəl dumwa nga məl sə dədəgur paməpamə gangəu.

⁴⁸ Ma mən piyari nyi ji dumwa abangau, kalar ndau, wu nda hənggəri ənga ja. Njir Roma a dzəgwa shili nda sa mbəliya ki Hyalər mən ənga 'yi'yir mən.”

⁴⁹ Ama kə pathlə wu pama nda, ndəra nja ngga ənga Kayafasu, ndəra naja ngə pubu kəra ndiya ənga dəgal wu fa ta, ndər, ji na, “Nahyu sən səra hyu ndər ar kəri mai.

⁵⁰ A dəri tsa'a vanyi nda tə arya nji patəu, ara nji patə a sara sanakər, a'yi hyi nggabiya abangə wa?”

⁵¹ Ndər kau, Kayafasu a'yi nana ənga yiwu kərnyi mai, ama ar viya pubu kəra ndiya ənga dəgal wu fa ta nga ji nana səra mambəl cabiya nyi abər Yesu wu nda tə arya njir Yahudiya,

⁵² ənga a'yi arya njir Yahudiya wacu mai, ama aga ja kabiya wazha Hyal kəra tətəlnakər a ndu duniya, aga nda də nji zəməu.

⁵³ Mbar ar pəci ta nga ndu gal lagu kəra nda sən tsəya Yesu.

⁵⁴ Agabangau, tsu Yesu wu 6au ar babal wu pama njir Yahudiya mai. Ba ji biya ji ma'yi a ndar vira ləhəu wu dzər tagə mashi, a ndu vanyi zər məlmə kəra nju ngga ənga Ifrayimu, a ndəna ndə nggya əkkə'yi zəmbəlma nyi'yar.

⁵⁵ Ənggəra mini nə lardur nə vəlbiya a dəri ləhəu, kə nji gangəu hya'ari sara wu məlmə yidədə a du Urshalima aga nda vuwa cina dzə ənggəra dladə nana kadivira lardur vəlna.

⁵⁶ A vuna, ndə dumwa ənga gal Yesu, tata'yi nda a vu ki Hyal, ndu yiyiwa kərnda, ndu na, “Mi nga hyu nggana? Ju shili wu mini kə ya?”

⁵⁷ Kabangəkau, pubu dədəgal'yar ənga njir Farisi a fiyar nda ndər anə nji abər kalar ndəra lari Yesu, nja nar nda ənga kusa aga nda mbar nyi.

*Nji Pər Nyi Mal Anə Yesu Wu Bethlani
(Matiwu 26:6-13; Markusu 14:3-9)*

¹ Mini nə lardur vəlbiya a hyiri pida kwa, ngə Yesu shili wu Bethlani, məlmə kəra Liyazaru a gwa, ndəra Yesu hya'ana sara vir tə ta.

² Ənggau, nji məliya nyi sər səm nə wagəu. Marthla ngə təkə sər səm kau, Liyazaru pathlə ja wu pama njira vər səm ənga ja.

³ Kə Maryamu həri pəla nə mal kisə kəra nji məl sara wu nardu, kəra nju dəl ənga gənnə gangəu. Ji sa pər nyi ar hya Yesu, kə ji bəsiya nyi ənga shishir kəra ja. Kə ki kəra nda a gwa nyi ənga shuni burdi kau.

⁴ Ama kə pathlə sara wu pama zəmbəlma nyi'yar kəra nju ngga ənga Yahuda Isikarayoti, ndəra wu nda sa thləna hya ja, na,

⁵ “Mi ngə də nji a'yi dəlna burdi kə ənga gənnə gangə (gənnə nə pəkə nə nji gharu makəru) nja nə nyi gənnə nyi anə nji dədəli maya?”

⁶ Yahuda na najaka ndər a'yi ara ju yiwu nji dədəli mai, ama ara naja ndər həl ngau. Naja ngə ndər səbə pərki nə gənnə, ənga ju dləwar kərnyə ənga sərə a gwa.

⁷ Kə Yesu na, “Piyari nya mau, ji fiya burdi kə aga pəcir hədə də.

⁸ A'yi hyi əkkə'yi nji dədəli cumu, ama a'yi hyi ənga yi cumu mai.”

Mba Miya Aga Tsa Liyazaru

⁹ A'yi bəliya sar mai, kə dlamir njir Yahudiya nəri abər Yesu a ndəna, ba ndə shili. Shilir nda a'yi aga nda lar Yesu wacu mai, ama aga nda lari Liyazaru, ndəra ji hya'ana sara vir tə ta.

¹⁰ Kə pubu dədəgal'yar gal lagu kəra nda sən tsəya Liyazaru ətsu.

¹¹ Ara arya səra da ənga Liyazaru ngə njir Yahudiya gangəu shabiya nda yi, ba ndə hənggəri ənga Yesu.

Yesu Vu Urshalima

¹² Əzəgəkura nyi kə dlamir nji gangəu kəra dla wu mini kə nggari abər Yesu a mbar lagu a vu Urshalima.

¹³ Ənggau, kə ndə bələr hyali hyifa ndə ma'yi a biya dləwu nyi, ndu wau ndu na,
“Fal a dari anə Hyal!”

“Barka anə ndəra dla
wu thləmər Thlagəu!”

“Barka anə tələr njir Izirayila!”

¹⁴ Ta Yesu uya zər kwara, ba ji dari, ənggəra nji tsəfəri abər,

¹⁵ “Ga sara hivər mai,
nagə culi Səhiyona.

Kəja tələr hyi a vər shili,

a'yi nggya a dar ya zər kwara.”

¹⁶ Tanggərma zəmbəlma nyi'yar a'yi nggabiya sə'yar kə kwatahə mai. Ama ayukudə kadakadarkur nə Yesu nyabiya dzə nga ndə dəngari abər tsətsəfə ngə sə'yar kə ar kəra ja, ənga kalar səra nji məl anə nyi aga nyabiya səra tsətsəfə nga nyi.

¹⁷ Njira a'yi ənga ja, ar pəci kəra ji ngga Liyazaru sara wu hu ta, ənga ji hya'ana nyi sara a vir tə ta, kə ndə dumwa ənga tətəlna səra Yesu məliya.

¹⁸ Ca ngə səra da, nji gangəu, ndə biya ndə biya thləwa nyi ara ndə nggari sə dədəgur kəra Yesu məlna.

¹⁹ Kə njir Farisi na anə kuvwar nda, “Lara mau, namən səmku təlkur mai, alaga kushu, kəja patər duniya a shari ndu nu nyi!”

Yesu Nana Tə Nyi

²⁰ Wu pama njira shili aga mini kau, alenyi nji a'yi kəra njir Gərikə ngau.

²¹ Ndə shili ara Fəlipəu, ndər Bethlesaida wu Galili, ndə sa yiwa nyi, “Maləmə, 'yi wu yiwu 'ya lar Yesu.”

²² Kə Fəlipəu ma'yi ji nda nar nyi anə Andərawusu, nanda məthlə kə ndə ma'yi ndə nda nar nyi anə Yesu.

²³ Kə Yesu shadəwa nda, ji na, “Pəci a dəri kəra nja kyaga ləri kadakadarkur anə Zər Nda.

²⁴ Ənga jiri nga yu na anə hyi, ma culi uhi a'yi tədə a gyiwu 'yi ji diya mai, ju nggya kəl naja. Ama ma ji diya, ju puwa li, ba ja hə kər dəgaləu.

²⁵ Kalar ndəra wu yiwu piya ja, ju nda tini. Ndəra gəra yiwu piya ja wu duniya kau arya yau, ju nda uya pi gəra kudau.

²⁶ Kalar ndəra wu məl thlər anə də, kəl ja nu də ənga jirkur. Vira ya ri a ndəna ngə ndər məl thlər anə də tsu. Dədə wu nda nə nyi dəgalkur anə ndəra wu məl thlər anə də.

Yesu Ndər Ar Kəra Tə Nyi

²⁷ “Kabangəkau, kəja tədəbə ngə dəfuwa yau. Ya, mi nga ya sən na? Ya na, “Tada, kətiya də ara pəci kə ya?” Awau, aga culi pəci kə nga yi shili ar pəci kau.

²⁸ Tada, nə nyi kadakadarkur anə thləmə ngau.”

Kə dahəu shida sara dəməlmau, “A nə nyir yi kadakadarkur anə thləmə də, ənga yu bəra nə nyi kadakadarkur wayu.”

²⁹ Ənggəra njira tata'yi a ndəna nggar dahə kau, kə ndə na, “Dlədə ngau.” Əngwar alenyi nji, “Waladi ngau, ngə ndər anə nyi.”

³⁰ Kə Yesu na anə nda, “Dahə kə shili aga hyi nga nyi, ama a'yi aga yi mai.

³¹ Kabəngəkə ngə pəcir numa anə duniya, kabəngəkə nga nju kədləbiya ndər səm təlkur ar kəra duniya a biya.

³² Ama nayau, ayukudə nji hər də sara gyiwu 'yi a dəməlmau, yu nda nggar nji a shili ara kərda.”

³³ Yesu nana abəngau aga ja cabiya culi tə kəra ju nda tau.

³⁴ Kə dlamir nji nar nyi anə Yesu, “Yi nggabiya wu dladə abər Kərsiti wu də ənga pi ba'anuwa. Ya, mi ngə də gu na, ‘Kəl nji hər Zər Ndau a diya?’ Wa ngə Zər Ndə ka?”

³⁵ Kə Yesu shadəwa nda, “Mbəmbəl kə wu nda nggya ənga hyi nə pəci kushu wacu. Ba mau ənga mbəmbəl kəra a'yi ara hyi, kadivira kuthla shili. Kalar ndəra wu bəu wu kuthləu naji wu sən vira ju ma'yi a ndari mai.

³⁶ Ma mbəmbəl kə a'yi tsu ənga hyi, hya fuwa mbərsar hyu mbəmbəla nyi, aga hya də wazha mbəmbəl.”

Ayukudə ji kudəna ndər kau, ba ji ma'yi, ji nda mbunakər ara nda.

Gəra Mbərsa Nə Njir Yahudiya

³⁷ Alaga ayukudā sē dēdēgur pamēpamē kēra Yesu mēlna wu mwar nda, nandē mbērsa ēnga ja mai.

³⁸ Najakē dārkēr aga ja nyabiya sēra nabi Ɔshaya nana,

“Thlagēu, wa ngē hēnggēri
ēnga sēra mēn nana,

ēnga anē wa,

ngē dēnama nē Thlagē cabiya dza?”

³⁹ Ca ngē mēliya nandē sēn mbērsa mai, ēnggēr kēra nabi Ɔshaya nana ar vanyi vi, abēr,

⁴⁰ “Ji mēliya nda ndē dā lēfau,

“Ji mēliya dēfuwa nda
dā ǂaǂalu,

Ara nda sara lari
sē ēnga liya nda,

ēnga nda nggabiya
ēnga dēfuwa nda,

kēra wu sēn shabiya nda
a shili ara yau,
aga ya shilēgēbiya nda.”

⁴¹ Nabi Ɔshaya nana abangau, ara ji lari kadakadarkur nē Yesu kēra wu nda cabiya dzau, ēnga ji ndēr ar kēra ja.

⁴² Alaga abangē ma, nji gangēu mbērsa ēnga Yesu, patē ākkē'yi alenyi njira nggurēm nē Yahudiya. Ama nandē sēn biyar babal mai, ara hivēr njir Farisi nda sara kēdlēbiya nda sara wu umbwa dāǂē dzē njir Yahudiya.

⁴³ Ara ndu yiwu fal sara wu miya nji a ndiya sara wu miya Hyal.

⁴⁴ Kə Yesu hya'ana dahəu ji na, “Kalar ndəra mbərsa ənga yau, ənga yi nga ji mbərsa waci mai, ama ənga ndəra səwa də.

⁴⁵ Kalar ndəra wu lar də, ju lari ndəra səwa də.

⁴⁶ Yi shili wu duniya ənggər mbəmbəl, aga kalar ndəra hənggəri ənga yau, tsu ju nggya wu kuthləu mai.

⁴⁷ “Kalar ndəra nggari highiḃə də, ama naji bəlari mai, a'yi nayi ngu nda məl numa anə nyi mai. Ara nayi a'yi shili aga sa məl numa anə duniya mai, ama aga duniya uya mbəḃəu lagu də.

⁴⁸ Ndəra piyari də, ji nggəl ara dləwu ndər də, a'yi ja ənga ndəra wu nda məl numa anə nyi. Ndər də, kəra yi nana, naja ngu nda məl numa anə nyi ar pəcir kuḃiyar duniya.

⁴⁹ Səra yu na a'yi sə kərḃə mai, ama Dəḃə ndəra səwa də, naja ngə nar də səra ya na ənga ndər kəra yu ndər.

⁵⁰ Yu səni abər ndər nyi ngu shili ənga pi gəra kuḃəu. Agabangə səra yu na, səra Dəḃə nar də ya na ngəu.”

13

Yesu Cina Hiya Zəmbəlma Nyi'yar

¹ Pəcir mini nə lardur nə Vəlna a shiliri ləhəu ənga Yesu ənga kərnyə a sənbiyari abər pəci nyi a ḃəri ləhəu aga ja sha a dara dənyə. Yesu a cabiyar ja yiwukur nyi anə nji nyi wu duniya, kəl ta ji cabiya nda yiwukur nyi ba'anə kuḃiyar piya ja.

² Ar pəci kəra Yesu əkkə'yi zəmbəlma nyi'yar a vər səm sər səm nə wagəu, shatan a fuwari wu dəfuwa Yahuda Isikarayoti zər Simanu aga ja thləna hya Yesu.

³ Yesu wu səni abər Tada a fuwari kalar sə wu tsa ja, ənga ju səni abər sara dəgya Hyal nga ja, ənga tsu a dəgya Hyal nga ju bəra nda sha.

⁴ Ar pəci kəra nda vər səm sər səm, kə Yesu hya'ari ji zədəna ləgutə nyi, ba ji həri sər bakə nyi, ba ji mbiya ar sara ja.

⁵ Ayukuda kau, kə ji puwa 'yimi a gwu cala ba ji dzəguya ci hiya zəmbəlma nyi'yar əni. Ju da da hiya nda ənga sər bakə kəra ji mbiya wu sara ja.

⁶ Kə Yesu shili əgya Simanu Biturusu, kə Biturusu na anə nyi, “Thlagəu, nagə ngu ci hiya yi ya?”

⁷ Əngwar Yesu anə nyi, “Nagəu nggabiya səra yu məl kabangəkə mai, ama gu nda nggabiya a ndu mwa.”

⁸ Əngwar Biturusu anə nyi, “Awau, nagə wu ci hi anə da ndangə mai.”

Kə Yesu shadəwa nyi, “Ma nayi a'yi cina hya gə mai, nagə a'yi nə da mai.”

⁹ Əngwar Biturusu anə nyi, “Thlagəu, ma abangə ja, a'yi hiya yi nga ga ci waci mai, ama ga dabəri ənga tsa yau ba kəra yau!”

¹⁰ Əngwar Yesu anə nyi, “Ndəra a pənar pər, a dər ja cicau, kəl ci hi nga ju yiwu wacu ara dza ja patə cici nga nyi. Nahyi cici nga hyi, ama a'yi patəkura hyi mai.”

¹¹ Ara ju səni ndəra wu nda thləna hiya ja. Ca ngə da, ji na, “A'yi papatəkura hyi ngə cici mai.”

¹² Ayukuda ji cina hiya nda patəu, kə ji har ləgutə nyi, ba ji bəra sha a ndar vir nggya nyi. Kə ji yiwa nda, ji na, “A nggabiyar hyi səra yi məliya hyi kə ya?”

¹³ Hyu ngga da Maləmə ənga Thlagəu, kakalə nga nyi, ara ca ngə səra ya ga nyi.

¹⁴ Ma nayi kəra Maləməər hyi ənga Thlagər hyi cina hiya hyi, a kyau nahyi ma hya kyaga cina hiya kuvwar hyi.

¹⁵ A cabiya hyir yi səra hya kyaga məl, nahyi tsu hya nu hiya yau.

¹⁶ Jiri nga yu na anə hyi, mafa a'yi a sən ndiya tarki nyi mai, ənga ndəra nji sau ənga cama a'yi a sən ndiya ndəra sə nyi mai.

¹⁷ Ma hya sənbiyar najaka jiri, abari ngə cacagulikura hyu nda də ma hyi məl thlər əni ya!

*Yesu Nana Ənggəra Nji Wu
Nda Thləna Hiya Ja*

(Matiwu 26:20-25; Markusu 14:17-21; Luka 22:21-23)

¹⁸ “Ar kəra hyi patə nga yu ndər mai. Wu sən yi njira yi cadəbiya. Ama yi cadəbiya hyi aga ndər Hyal kəra tsətsəfau a nyabiya dzau, kəra na, ‘Ndəra vər səm sər səm də ngu gal lagur thlə hiya yau.’

¹⁹ Nayi ngu na sə'yar kə kadivira ji dərkər, aga ma ji nda dərkər hya səni abər nayi ngə Kərsiti.

²⁰ Jiri nga yu na anə hyi, kalar ndəra dləwuri ndəra yi səwa, nayi nga ji dləwuri. Kalar ndəra dləwuri də tsu, ndəra səwa də nga ji dləwuri.”

²¹ Ayukuda Yesu nana ndər kau, kə sə kə ɓwanə nyi kər wu dəfuwa ja gagaɗau. Kə ji cabiya nda ar babal abər, “Ənga jiri pathlə wu pama hyu nda thləna hiya yau.”

²² Kə zəmbəlma nyi'yar mbar tsatsamə kərnda, ara nandə wu səni tara wa nga ju ndər ar kəri kə mai.

²³ Pathlə wu pama zəmbəlma kəra Yesu wu yiwu gagaɗau, nggashi ja ar thlərpa ja.

24 Kə Simanu Biturusu guthlar nyi aga ja yiwabiya nda Yesu, “Wa nga ju ndər ar kəri ka?”

25 Naja kəra ləha ar dzər nyi uzhiya kər ju yiwa Yesu, “Thlagəu, wa nga ja?”

26 Kə Yesu shadəwa, “Ndəra yi kadlər macikəl, yi fuwa a gwu cala, ba yi nə nyi, naja ngau.” Kə Yesu kadləri macikəl ba ji fuwa a gwu cala ba ji nə nyi anə Yahuda zər Simanu Isikarayoti.

27 Ənggəra Yahuda dləwuri macikəla nyi, ba shatan gu ja.

Kə Yesu na anə nyi, “Səra gu yiwu ga məl, məl ənga kusa.”

28 Ama wu pama nanda patə kəra a vər səm sər səm, ndə a'yi kəra sənbiya səra də Yesu na ndər kə anə nyi mai.

29 Ta ndu səni abər naja ngə ənga mbəl gənnar nda, ma ndu nggani abər səra Yesu na anə nyi, ca ngə, ja ma'yi ja nda dəlbiya nda səra ndu yiwu aga mini. Ma a'yi abangə tsu mai, ja nə nyi anə nji dafali səra a'yi.

30 Yahuda tsu, ənggəra ji dləwuri macikəla nyi, ba ji biya ma'yi. Ar pəci kau, vu'yi a dəri.

Dladə Mafəliyangəu

31 Ayukudə Yahuda ma'yi a biya, kə Yesu na, “Kabangəkau, nga nju nda nə nyi kadakadarkur anə Zər Ndau, ənga Hyal ənga kərnyu wu nda uya kadakadarkur arya ja.

32 Ma Hyal uya kadakadarkur lagu Zər nyi, Hyal ənga kərnyu ngu nda nə nyi kadakadarkur tsu anə Zər nyi ənga kusa.”

33 Əngwar ja anə nda, “Wazha də, nə pəci kushu nga yi əkkə'yi hyi wacu. Hyu nda gal də, ama

ənggəra yi nar nyi anə njira nggurəm nə Yahudiya, abangə nga yu na anə hyi kabangəkau, abər, ‘Vira yu ma'yi a ndari, nahyi wu sən ndəna mai.’

³⁴ “Dladə mafəliyangə nga yu lə anə hyi, ca ngə, hya yiwu kərhyi. Ənggər kəra yi yiwu hyi, abangə nga hya yiwu kuvwar hyi.

³⁵ Lagu kau, ngə nji patə wu nda səni abər nahyi zəmbəlma də nga hyi, ma hyu yiwu kuvwar hyi.”

Biturusu Wu Nda Kəpalna Səni Yesu

(Matiwu 26:31-35; Markusu 14:27-31; Luka 22:31-34)

³⁶ Simanu Biturusu yiwa nyi, “Thlagəu, nəma nga ga?”

Yesu shadəwa nyi, “Vira yu ma'yi a ndari, nagə wu sən nu də kabangəkə mai, ama gu nda nu də a səkar kushu.”

³⁷ Əngwar Biturusu anə nyi, “Thlagəu, mi ngə də nayi wu sən nu ngə kabangəkə maya? Yu sən ləri piya yau, arya gau.”

³⁸ Kə Yesu shadəwa, ji na, “Gə wu sən ləri piya gau arya ya? Yu nar ngə jirkura nyi, kadivira vəgəmə a wau əshina, gu nda kəpalna sən də, ar kər ar kər makəru.”

14

Yesu Ngə Lagur Ndara Tada

¹ “A sara huđa hya ndzə mai. Hya hənggəri ənga Hyal, ba hya hənggəri ənga yi tsu.

² Wu ki dədə vir nggya a'yi gangəu. Ma a'yi nda də abangə mai, yu nda nar hyi. Ma'yi nga ya a ndəna aga ya da pabər hyi vi.

³ Ma ya ma'yiri yi da pabər hyi vi, yu sha shida aga ya sa fa'ari hyi a ndəgya yau, aga vira ya ri, əna nga hyu nggya.

⁴ Vira yu ma'yi a ndari, hyu sən lagur ndəna.”

Yesu Ngə Lagu Dəra Tada

⁵ Kə Toma na anə Yesu, “Thlagəu, na'yu sən vira gu ma'yi a ndar kə mai, ya abari nga 'yi wu səni laguwa nya?”

⁶ Yesu shadəwa nyi, ji na, “Nayi ngə lagu, nayi ngə jiri ənga nayi pi. Ndər sən shili əgya Tada a'yi mai, kəl lagu da.

⁷ Maja abər hyu sən da, hyu sən Dədə tsu. Ama mbar kabangəkə hyu nda səni nyi ənga hyu nda lari nyi.”

⁸ Kə Fəlipəu na, “Thlagəu, canə 'ya Tada, ba huḍa 'ya pida.”

⁹ Yesu shadəwa nyi, “Fəlipəu, pəci kə yi həri ənga hyi kau, ba'anə kabangəkə nagə wu sən da mai ya? Kalar ndəra lar da a lar ja Tada. Abar nga gu sən na, ‘Canə 'ya Tada ka’?”

¹⁰ Nahyi a'yi hənggəri abər nayi wu Tada, ənga Tada wu yi wa? Ndər kəra yu na anə hyi, nə kərda ngə mai. Ama Tada kəra a vər nggya wu yi nga vər məl thlər nyi.

¹¹ Hya hənggəri ənga yau, abər nayi wu Tada ənga Tada wu yau, a'yi abangə mai hya hənggəri ənga yi arya sə dədəgur paməpamə gangə kəra yi məl na.

¹² Jiri nga yu na anə hyi, kalar ndəra hənggəri ənga yau, ju məliya thlər kəra yu məl tsu. Ju nda məliya thlər kəra ndiya kəra yi məl, ara yu ma'yi a dəgya Tada.

¹³ Ənga yu nda məliya kalar səra hyu kədiyau wu thləmə də, aga ja dla ənga kadakadarkur anə Tada lagu Zər.

¹⁴ Kalar səra hyu kədi wu thləmə də, yu məliya hyi.

Alkawal Shilər Mambəl Cicau

¹⁵ “Maja hyu yiwu də, hyu bəlari dladə də.

¹⁶ Ba ya dzəgwa kədi Tada, aga ja səwa hyi vanyi ndər dləwa dzə kəra wu nggya ənga hyi ba'anuwa.

¹⁷ Naja ngə Mambəl nə jiri, kəra a vər cabiya jirkur ar kəra Hyal. Duniya wu sən dləwuri nyi mai, ara nandə wu lari nyi mai ənga nandə wu sənbiya nyi mai. Ama nahyi nər hyi, hyu sənbiya nyi, ara a'yi ja ənga hyi ba ənga wu dəfuwa hyi.

¹⁸ Nayi wu piyari hyi ənggər məsətə mai, yu sha shili əgya hyi.

¹⁹ Ayukudə pəci kushu, njir duniya wu bəra nda lar də mai, ama nahyi, hyu nda lar də. Ara a'yi yi ənga pi, nahyi ma, hyu də ənga pi.

²⁰ Ar pəci ta nga hyu nda sənbiya abər nayi wu Dədə, nahyi wu yau ənga nayi wu hyi.

²¹ Kalar ndəra dləwuri dladə də, ba ji bəlari, naja ngə ndəra wu yiwu də. Ndəra wu yiwu də tsu, Dədə wu nda cabiya nyi yiwukur, nayi tsu yiwu nda yiwu nyi ənga yu cabiya kərdə anə nyi.”

²² Kə Yahuda (a'yi Isikarayoti mai) na anə nyi, “Ama Thlagəu, abar nga ga sən canə 'ya kər, ama a'yi anə njir duniya patə maya?”

²³ Kə Yesu shadəwa nyi, ji na, “Kalar ndəra wu yiwu də, ju bəlari highiə də. Dədə tsu ju nda yiwu nyi, ba 'ya shili 'ya sa nggya wu ja.

24 Kalar ndëra gëra yiwu ða, naji wu bëlari highiðë ða mai. Ndër këra hyu nggari yu na, nè ða ngë mai, ama nè Dëða ndëra sëwa ða ngau.

25 “Patë së'yar kau, yi nar hyi tsu yi ënga hyi.

26 Ama ndër dlëwa dzau, Mambël Cicau, këra Dëða wu nda sëwa wu thlëmë ða, ju nda highiðër hyi patër sau, ënga ju nda ðëngar hyi patër sëra yi saya na anë hyi.

27 “Yu piyari hyi ënga hudë përtëu. Hudë përtë ða nga yu nè hyi. A'yi ënggër këra njir duniya wu lë nga yu lë mai. A sara hya hivër mai, ënga hya sara piyari hudë hyi a ndzë ënga hangëkala hyi a hya'ari mai.

28 “A nggar hyi ënggëra yi na, abër, ‘Ma'yi nga yau, yu bëra sha shili.’ Ma jiri nga hyu yiwu ða, hya caguli, ara yu ma'yi a ðara Tada, arya Tada a ndiya ða ënga ðëgalëu.

29 Yi nar hyi abangau tsu ji gëra ða, aga ma ji ðarkër hya ðabaga hënggëri.

30 Tsu yu bëra nda ndër anë hyi gangë mai, ara ndëra vër sëm tëlkur ar këra duniya wu shili. Naja a'yi ënga ðënama ar këra yi mai.

31 Ya vër mël patër sëra Tada na ya mël, aga njir duniya a sëni abër yu yiwu Tada. Shili a mau, mëna piyari vi kau.”

15

Yesu Ngë Wur Ndërma Në Jijiri

1 “Nayi ngë wur ndërma nè jijiri, Dëða ngë thlagër fa.

² Kalar tsa wu kəra gəra pə wazha ba dədə thlana nyi. Ama kalar tsa wu kəra wu pə wazha, ba dədə tsatsa'wuna nyi aga ja bəra pə wazha gangəu.

³ Kabangəkə cici nga hyi, aya ndər də kəra yi nar hyi.

⁴ Hya nggya wu yau, nayi tsu wu hyi. Tsa wu a'yi a sən pə wazha ar kərnyī mai, kəl ma ji nggya ar mamar wu. Abangə tsu nahya ma a'yi hya sən pə wazha ar kərhyi mai, kəl ma hyi nggya wu yau.

⁵ “Nayi ngə wur ndərma, nahyi ngə tsa nyi'yar. Kalar ndəra nggya wu yau ənga nayi wu ja, ju pə wazha gangəu. Ma a'yi wu yi nga hyi mai, sə a'yi hyu sən məliya mai.

⁶ Kalar ndəra a'yi wu nggya wu yi mai, kakalə nga ja ənga tsa wu kəra nji thlana, ba ji ulənakər. Nju sən tsəmiya nda, ba nja puwa a gwu u'u, ba nja nggyina nda.

⁷ Ma hyi nggya wu yau, ənga ndər də nggya wu hyi tsu, hyu sən yiwa də kalar səra hyu cim ba Hyal a nə hyi.

⁸ Səra wu shili ənga kadakadarkur anə Dədə, ca ngə hya pə wazha gangəu. Lagu kə nga hyu cabiya abər nahyi zəmbəlma də ngau.

⁹ “Ənggər kəra Dədə cabiya də yiwukur, abangə nga yi cabiya hyi yiwukur tsu. Nahyi tsu hya nggya wu yiwukur də.

¹⁰ Ma hyi bəlar dladə də, hyu nggya wu yiwukur də, ənggər kəra yi bəlar dladə Dədə, ba yi nggya wu yiwukur nyi tsu.

¹¹ Yi na anə hyi abangau aga caguli də a nggya wu hyi, ənga aga cagulir hyi a nyabiya dzau.

¹² Dladə də ca ngə, hya yiwu kərhyi, ənggər kəra yi cabiya hyi yiwukur.

¹³ Yiwukur kəra a ndiya patəu, ca ngə nda lər piya ja arya bazhi nyi'yar.

¹⁴ Nahyi bazhi də ngə'yar, ma hyi bəlar dladə də.

¹⁵ Tsu yu bəra ngga hyi ənga mafa mai, ara mafa a'yi wu sən səra tarki nyi wu məl mai. Ama yu ngga hyi ənga bazhi, ara yi canə hyi patər səra yi nggari ara Dədə.

¹⁶ Nahyi ngə cadəbiya də mai, ama nayi ngə cadəbiya hyi, ənga yi səwa hyi aga hya nda pə wazha kəra wu nggya ba'anuwa. Ba Dədə dzəgwa nə hyi kalar səra hyu kədiyau wu thləmə də.

¹⁷ Kəja, dladə kəra yi nə hyi, hya yiwu kuvwar hyi.

Njir Duniya Piyari Shishir Dza Njir Nu

¹⁸ “Ma njir duniya piyari shishir dza hyi, hya səni abər nayi nga ndə piyari shishir dza nyi tanggərma.

¹⁹ Maja abər nə njir duniya nga hyi, njir duniya a cabiya hyiri yiwukur. Ama ara kə nahyi a'yi nə duniya mai, ənga nayi ngə cadəbiya hyi sara wu duniya, ca ngə məliya njir duniya piyari shishir dza hyi.

²⁰ Hya dəngari ndər kəra yi saya na anə hyi, abər, ‘Mafa a sən ndiya tarki nyi mai.’ Ma ndə nə də bwaḃwatəu, ndu nda nə hyi bwaḃwatə tsu. Ma ndə məl thlər ənga highiḃə də, ndu nda məl thlər ənga nər hyi tsu.

²¹ Ndu nda mæl sə'yar patə anə hyi abangau, arya thləmə də, ara nandə wu səni ndəra səwa də mai.

²² Ma abər a'yi yi shili, yi sa ndər anə nda mai, nanda a'yi njir bikə mai. Ama kabangəkə, sə a'yi ndu uya nda na arya bikər nda mai.

²³ Kalar ndəra piyari shishir dza yau, a piyari ja nə Dədə tsu.

²⁴ Maja abər a'yi yi məliya wu pama nda səra ndə a'yi saya məliya mai, nandə wu də njir bikə mai. Ama kabangəkəu, a lar nda sə dədəgur kəra yi məlna, ama alaga abangau, kə ndə piyari shishir dza yau ənga nə Dədə tsu.

²⁵ Ama sə kə dərkər aga ja nyabiya səra tsətsəfə wu dladər nda, abər, 'Ndə piyari shishir dza yi gəra ənga səra yi ndzana.'

²⁶ "Yi wu nda səwa hyi ndər dləwa dzə sara dara Tada. Naja ngə Mambəl jiri kəra shida sara dara Tada, ju nda sa lər sakida ar kəra yau.

²⁷ Nahyi ma, hyu nda lər sakida ar kəra yau, ara tsu tangərma ənga yi nga hyi.

16

¹ "Yi nar hyi sə'yar kə patəu, ara hya sara pəna mbərsar hyi.

² Ndu nda kədləbiya hyi sara wu umbwa dəbə dzə njir Yahudiya. Pəca vər shili ma, kəra ma ndə tsəya hyi, ba nda nggani abər thlər Hyal nga nda vər mæl.

³ Ndu nda mæl culi sə'yar kau, ara nandə wu sən Tada mai ənga nandə wu sən də mai.

⁴ Ama yi nar hyi sə'yar kau, aga ma ndə dərkər, hya dəbəga dəngari abər a nar hyir yau.

“Nayi nar hyi sə'yar kə tsu kadə mai, ara tsu yi əkkə'yi hyi.”

Thlär Nə Mambəl Cicau

⁵ “Kabangəkau, ma'yi nga yi a dəgya ndəra səwa də, ama wu pama hyi ndə a'yi yiwär də, ‘Nəma nga gu ma'ya?’

⁶ Arya yi nar hyi sə'yar kau, kəja hya nyabiyar dzə ənga hüdə ndzəndzau.

⁷ Ama ya nar hyi jirkura nyi, nahyi ngu dəhar məsahəkura ma'yi də kau. Ma nayi a'yi ma'yi mai, ndər dləwa dzə kau, wu shili mai. Ama ma yi ma'yi, yu nda səwa hyi nyi a shili ara hyi.

⁸ Ar pəci kəra ndər dləwa dzə kə shili, ju sa cabiya nyi anə njir duniya abər dəngar nda ar kəra bikau, ənga tsapəkür ənga numa a'yi kakalə mai.

⁹ Dəngar nda ar kəra bikau, a'yi kakalə mai ara nandə hənggəri ənga yi mai.

¹⁰ Dəngar nda ar kəra tsapəkür, a'yi kakalə mai ara ma'yi nga yi a dəgya Dədə, vira tsu hyu ǝəra nda lar də mai.

¹¹ Dəngar nda ar kəra numa, a'yi kakalə mai ara a məlnar nji numa anə ndər səm təlkür ar kəra duniya.

¹² “A'yi yi ənga sər na gangə kəra hiyau ya kyaga nar hyi kabangəkau, ama nahya sən səsə'wuri nda kwatahə mai.

¹³ Ama ar pəci kəra Mambəl nə jiri shili, ju sa ləbiya hyi a ndu səra jiri patəu. Naji wu ndər wu dənamar kərnyı mai, səra ji nggari nga ju na, ənga ju nda nar hyi ar kəra səra a vər shili.

¹⁴ Ju nda shili ənga kadakadarkür anə də, lagür nar hyi patər səra ji nggari ara yau.

15 Patər sərə nə Dədə, nə də ngau. Ca ngə sərə də yi na, abər Mambəl wu nda dləwuri sərə ara yau, ba ja nə hyi.

16 “Ayukuda pida kushu nahyi wu bəra lar də mai, ayukuda pida kushu wayu ba hya bəra lar də.”

*Hudə Ndzəndə Zəmbəlma 'yar
Wu Nda Sha Aga Hudə Pipida*

17 Əngwar alenyi zəmbəlma nyi'yar anə kuvwar nda, “Mi nga ju dənga ənga ndər ka, ‘Ayukuda pida kushu nahyi wu bəra lar də mai, ənga ayukuda pida kushu ba hya bəra lar də wayu ka’? Ənga tsu mi ngə dənga nyi ənga ji na, ‘Ara ma'yi nga yi a dəgya Dədə ka’?”

18 Ndə dumwa ənga yiwa kərnda, “Mi ngə dənga nyi ənga ‘ayukuda pida kushu ka’? Namən a'yi nggabiya sə kə ju na kə mai.”

19 Yesu tsambiya abər zəmbəlma nyi'yar ndu yiwu nda yiwa nyi ar kəra sə kau, kə ji na anə nda, “Hyu yiwa kərhyi ar kəra sərə yi na, abər, ‘Ayukuda pida kushu tsu hyu lar də mai, ənga ayukuda pida kushu ba hya bəra lar də wayu kə' ya?”

20 Jiri nga yu na anə hyi, hyu nda tiwi, hya pə sələm, ama njir duniya kəl caguli nga ndu caguli. Hyu nda ndzə hudə gagadau, ama ndzə hudər hyu nda sha aga hudə pipida.

21 Ma mala ar tsəkar ya, bwaḃwatə nga ja a gwa ara pəci nyi a dər. Ama ma zər a biyari, ba ja fa'ari ənga bwaḃwatə kəra ji a gwa, ara hudə pipida nə zər kəra shili wu duniya.

22 Abangə ngə nga nyi ənga hyi. Kabangəkau, pəcir ndzə hudər hyi ngau, ama yu bəra nda lar hyi

wayu, ba huda hyi a dzəgwa pida. Huda pipidar hyi tsu, ndər sən dləwuri ara hyi a'yi mai.

²³ Ar pəci ta, tsu hyu yiwa sə ara yi mai. Yu nar hyi jiri, Dəda wu nda nə hyi kalar səra hyi yiwa wu thləmə də.

²⁴ Ba'anə kabangəkau, sə a'yi kəra hyi yiwa wu thləmə də mai. Yiwa mau, ba nja nə hyi, aga huda pipidar hyi a nyabiya dzau.

²⁵ “Yi ndər anə hyi ənga karapə aga ya nar hyi sə'yar kau, ama pəci wu shili tsu yu nda ndər ənga karapə mai ama yu ndər ar kəra Dəda ar babal.

²⁶ Wu pəci ta, hyu nda kədi sə wu thləmə də. Nahyi ngu nda kədi Dəda ənga kərhyi a'yi nayi nga kədi anə hyi mai.

²⁷ Ara Dəda ənga kərnyi wu yiwu hyi ara hyi cabiya də yiwu dzə ənga hyi hənggəri naja ngə səwa də a shili.

²⁸ Yi shili wu duniya sara ara Tada, kabangəkə piyari nga yi duniya, ya bəra sha a dəgya Tada.”

²⁹ Kə zəmbəlma nyi'yar na anə nyi, “Ənghəng! Kabangəkau, nga gu ndər ar babal gəra ənga karapau.

³⁰ Kabangəkau, nga 'yi wu səni abər sə a'yi dədəwa anə ngə mai. Gu sən nar nyi anə ndau, səra ju yiwu ja yiwa ngau. Kau, a məliya ri 'yi hənggəri, ənga jiri sara ara Hyal nga gau.”

³¹ Kə Yesu shadəwa nda, ji na, “Kabangəkau, a hənggəri hyi ənga nyi ya?”

³² Pəca vər shili, kəja a dəri, kəra kalar ndu nda tətəlnakər, ba kalar ndə a hwinakər a vu ki nyi, ba hya piyari də zhizhi də. Ama alaga abangau, a'yi yi zhizhi də jijiri mai, ara Tada a'yi ja ənga yau.

³³ “Yi wu na sə'yar kə anə hyi ara wu yi nga hyu uya hudə pərtəu. Wu duniya kə hyu nda lar ɔwaɔwatəu, ama hya səsə'wuri ara a səmkur yi təlkur ar kəra duniya.”

17

Yesu Kədi Hyal Aga Kənyi

¹ Ayukuda Yesu nana ndər 'yar kau, kə ji hya'anakər a dəməlmə ji kədi Hyal, ji na, “Tada, pəci a ɔari. Ga nə nyi kadakadarkur anə Zər ngau, aga naja tsu ja shili ənga kadakadarkur anə ngau.

² Ara gə nə nyi dənəma anə Zər ngau ar kəra nji patəu, aga ja lər pi gəra kudəu anə patər njira gə nə nyi.

³ Pi gəra kudəu, ca ngə nja sən ngau, nagə kəra Hyal nə jijiri wacu, ənga Yesu Kərsiti, ndəra gə səwa a shili.

⁴ Yi dla ənga kadakadarkur anə ngau wu duniya lagur məlna thlər kəra gə nə ɔa aga ya məl.

⁵ Kabangəkəu, Tada, nə ɔa kadakadarkur kabangəkə wu mwa ngau, culi kadakadarkur kəra a'yi yi əni ənga gə ta kadivira duniya ɔarkər.

Yesu Kədi Hyal Anə Zəmbəlma Nyi'yar

⁶ “A cabiya ngər yi abər wa nga ga anə njira gə nə ɔa wu duniya. Njira ɔəɔmə nə ngə nga nda, ama ba gə nə ɔa nda, nanda tsu a ɔələr nda ndər ngau.

⁷ Kabangəkəu, wu sən nda abər kalar səra a'yi ara yau, sara ara gə nga nyi.

⁸ Ara kalar ndər kəra gə nar ɔa, a nar ndar yau, ba ndə dləwuri. Ənga jiri ndu səni abər sara ara gə nga yau, ənga a hənggər nda abər nagə ngə səwa ɔa.

⁹ Ya vər kədiyau, arya nda. Nayau, a'yi a vər kədiyau, arya duniya patə mai, ama arya njira gə nə də, ara nə ngə nga nda.

¹⁰ Patər njira ara yau, nə ngə ngau, ənga tsu patər njira ara gau nə də ngau. A uyar yi kadakadarkur lagur nda.

¹¹ Kabangəkau, ya vər sha a da ara gau, ara pəcir nggya də wu duniya a kudəri, ama nanda, tsu nda wu duniya. Tada, Ndə Cicau, ga kətiya nda ənga dənamar thləmə ngau, thləmə ngau kəra gə nə də, aga nda də zəmə ənggər kəra ma ənga gau.

¹² Ar pəci kəra yi tsu ənga nda, yi kətiya lagur dənamar thləmə ngau, thləmə ngau kəra gə nə də. A bəlar ndar yau, ndə a'yi kəra sa wu pama nda mai, kəl ndə sasa ta aga ndər Hyal a nyabiya dzau.

¹³ “Kabangəkau, kəja ya vər sha a da ara gau, ama yu na sə'yar kə tsu yu duniya aga njir nu də nda nyabiya dzə ənga caguli wu dəfuwa nda.

¹⁴ A nə ndar yi cama ngau, ba njir duniya piyari shishir dza nda, ara nanda a'yi nə duniya mai, ənggər kə nayau, a'yi yi nə duniya mai.

¹⁵ Nayi kədiyau, aga ga fa'abiya nda sara wu duniya mai, ama aga ga kətiya nda ara ndə dəmwa 'yi kau.

¹⁶ Nanda a'yi nə duniya mai, ənggər kə nayi a'yi yi nə duniya mai kau.

¹⁷ Ga cina nda lagur jiri, ndər ngau jiri ngau.

¹⁸ Ənggər kəra gə səwa də a shili wu duniya, abangə nga yi səwa nda a ndu duniya tsu.

¹⁹ Arya nda nga yi lər kərda, aga thlər cici kau, aga nanda tsu nda də cicau lagu jirkur.

Yesu kədi Hyal Ar Kəra Patər Njir Nu

20 “Kēdi ɗa a'yi anə nda waci mai, ama anə kalar njira wu nda hənggəri ənga yi lagur camar nda.

21 Tada, kēdi ɗa, bəgə nda ɗa zəməu, ənggər kəra ma ənga gau. Bəgə nda ɗa zəmə wu ma, aga njir duniya a səni abər nagə ngə səwa ɗa.

22 A nə ndar yi kadakadarkur kəra gə nə ɗa, aga nda ɗa zəmə ənggər kəra ma zəməu.

23 Yu nda nggya wu nda, ənga nagə tsu wu yau, aga nda ɗa zəmə ənga jiri. Lagu kə ngə njir duniya wu nda səni abər nagə ngə səwa ɗa, ənga nda səni gu yiwu nda ənggər kəra gu yiwu ɗa.

24 “Tada, cim ɗa, ca ngə njira gə nə ɗa, nda nggya ənga yi ar vira ya ri. Yu cim nda lari kadakadarkur ɗa, kadakadarkur kəra gə nə ɗa arya gu yiwu ɗa kadivira gə məliya duniya.

25 Tada, ndə tsapəu, njir duniya wu səni ngə mai, ama nayau, yu sən ngau ənga nanda nər nda, ndu səni abər nagə ngə səwa ɗa.

26 A cabiya ngər yi anə nda ənga yu nda dumwa ənga ca ngau anə nda. Lagu kə ngə yiwu kəra gu yiwu ɗa wu nda nggya wu nda ar babal, ənga nayi ənga kərɗa wu nda nggya wu nda.”

18

Nji Dəlna Yesu Ba Nji Mbar Nyi

(Matiwu 26:47-56; Markusu 14:43-50; Luka 22:47-53)

¹ Ayukuda Yesu kudəna kēdi Hyal, ba ji tərabiya əkkə'yi zəmbəlma nyi'yar a biyar ya dagə Kiduronu. A biyar ya dagə kau, vanyi masəmə a'yi, ba Yesu əkkə'yi zəmbəlma nyi'yar ma'yi a vuwa gwa.

² Yahuda, zəmbəlma Yesu kəra thləna hiya ja wu sən vi kau, ara Yesu əkkə'yi zəmbəlma nyi'yar wu yidaga dəbə dzə a gwa.

³ Kə Yahuda shili wu masəmə kau, ji dumwa ji ca lagu anə bwata soja'yar, ənga njir bəla ki Hyal kəra pubu dədəgal'yar ənga njir Farisi səwa. Ndə shili ənga u'ur təsə ba pitəlla ənga kar pa.

⁴ Yesu, ara ju səni səra wu nda də ənga ja, ba ji biya, ji biya yiwa nda, “Wa nga hyu gala?”

⁵ Kə ndə shadəwa nyi, ndə na, “Yesu ndə sara wu Nazəratu.” Əngwar Yesu anə nda, “Nayi ngau.” Yahuda ndəra thləna hiya Yesu a'yi ja tata'yi əkkə'yi nda.

⁶ Ənggəra Yesu na, “Nayi ngau,” ba ndə sha də ndəl də ndəl, ba ndə dlanakər a gyiwu 'yi.

⁷ Kə Yesu bəra yiwa nda, ji na, “Wa nga hyu gala?” Əngwar nda, “Yesu ndər Nazəratu.”

⁸ Əngwar Yesu anə nda, “A nar hyir yi abər nayi ngau. Ma nayi nga hyu gal, hya piyari nji kau, nda ma'yi.”

⁹ Səkə dərkər aga ja nyabiya ndər kəra ji nana, “Nayi a'yi tini alaga ndə zəmə wu njira gə nə də mai.”

¹⁰ Simanu Biturusu ndəra a'yi ənga katsakər ara ja, ba ji tsəbiya katsakər nyi, ba ji thlana himi mazəma mafa nə pubu kəra ndiya ənga dəgaləu. Thləmər mafa kə ca ngə Malkusu.

¹¹ Kə Yesu nar nyi anə Biturusu, “Shabiya katsakər ngau a gwu ki nyi. A'yi kyau ya təwari sara wu kyakiwa nə bwaḃwatə kəra dədə nə də kə wa?”

*Yesu Shili Wu Mwar Anasu
(Matiwu 26:57-58; Markusu 14:53-54; Luka*

22:54-57)

¹² Kə bwata soja'yar ta ənga dəgalər nda, daḅə ənga njir ḅəla ki Hyal mbar Yesu, ba ndə mbiya nyi.

¹³ Tanggərma, ba ndə hər nyi a ndəgya Anasu, ara naja səlku sal nə Kayafasu. Wu fa ta, Kayafasu ngə pubu kəra ndiya ənga dəgaləu.

¹⁴ Kayafasu ngə lər sawara anə njira nggurəm nə Yahudiya abər a ɖari tsa'a ndə zəmə a tə arya nji.

Biturusu Kəpalna Səni Yesu

¹⁵ Kə Simanu Biturusu ənga pathlə wu pama zəmbəlma nə Yesu ndu nu Yesu wu ndəl wu ndəl. Ara pubu kəra ndiya ənga dəgal wu səni najaka zəmbəlma nə Yesu, ba ji piyari nyi aga ja vu huḁə ki nə pubu kəra ndiya ənga dəgal ənga Yesu.

¹⁶ Ama Biturusu nə nyi ba ji ta'yi a biya miya ki, a biya. Kə zəmbəlma kəra pubu kəra ndiya ənga dəgal kə wu səni kau, biya ji biya ndər anə kwa kəra a vər ḅəla miya ki, ba ji vu ənga Biturusu.

¹⁷ Kə kwa ḅəla miya kiya nyi, na anə Biturusu, “Nagə ma, pathlə gau wu pama zəmbəlma nyi, əndəga?”

Kə ji shadəwa, ji na, “Awau, nayi a gwa mai.”

¹⁸ Ara shishi'wu kəra vi, agabangə kə mafa'yar əkkə'yi njir ḅəla ki Hyal mbəbiya u'u tata'yi nda, ndu ɖaha. Biturusu tsu a'yi ja wu pama nda ta'yu ju ɖaha u'u.

*Pubu Kəra Ndiya Ənga Dəgaləu**Yiwa Miya Yesu*

(*Matiwu 26:59-66; Markusu 14:55-64; Luka 22:66-71*)

¹⁹ Kə pubu kəra ndiya ənga dəgal yiwa miya Yesu ar kəra zəmbəlma nyi'yar ənga highiḁə nyi.

²⁰ Kə Yesu shadəwa nyi, ji na, “Ndər də, ar babal nga yi na anə nji patəu, yi highiḡə wu umbwa daḡə dzə njir Yahudiya ənga wu ki Hyal vira daḡə nə njir Yahudiya ari ar babal. Sə a'yi kəra yi na dədəwa mai.

²¹ Mi ngə də gu yiwa miya ya? Yiwa miya njira nggar sərə yi na. A nggabiya nda sərə yi nana.”

²² Ənggəra Yesu nana abangau, kə vanyi ndər ḡəla ki Hyal kəra ləha dzər nyi nə nyi tsəbalma, əngwar ja anə nyi, “Abangə nga nju ndər anə pubu kəra ndiya ənga dəgal ya?”

²³ Yesu shadəwa nyi, ji na, “Ma yi nana sərə a'yi tsa'a mai ba ga cabiya də, ama ma yi nana sərə tsa'a, mi ngə də gə dəgə də?”

²⁴ Kə Anasu səwa nyi mbamba a ndəgya Kayafasu ndəra naja ngə pubu kəra ndiya ənga dəgaləu.

Biturusu Bəra Kəpalna Səni Yesu

(Matiwu 26:71-75; Markusu 14:69-72; Luka 22:58-62)

²⁵ Ma tsu Simanu Biturusu ta'yi ar vi ta, ja vər dəha u'u, kə nji yiwa nyi, “Nagə ma pathlə gu pama zəmbəlma nyi ya, əndəga?”

Kə ji kəpalna, ji na, “Nayi a gwa mai.”

²⁶ Pathlə wu pama mafa nə pubu kəra ndiya ənga dəgaləu, kəra zaməya ndə ta Biturusu thlana himiya ja ta, ka na anə nyi, “Mi nga gu na ka? A'yi gə pathlə wu pama njira yi lari nyi ənga ja wu masəmə ta wa?”

²⁷ Kə Biturusu ḡəra kəpalna, ənggərna kə vəgəmə wau.

Yesu Wu Mwar Bilatusu
(*Matiwu 27:1-2,11-14; Markusu 15:1-5; Luka 23:1-5*)

²⁸ Əmudlə kadə kə njira nggurəm nə Yahudiya ləbiya Yesu sara wu ki Kayafasu a ndar pathla nə gwamna nə Roma. Kə ndə nggəl ara vu pathla nyi ara nda sara də diyadiyaəu ba ja kar nda ara səm lardur nə vəlna.

²⁹ Agabangau, kə Bilatusu biya thləwa nda a biya, ba ji yiwa, “Mi ngə vazə kəra hyi shili əni a miya ndəla ndə ka?”

³⁰ Kə ndə şadəwa nyi, ndə na, “Maja abər ndə kau, a'yi ndə vavazə mai, na'yu shili ənga ja ənggə mai.”

³¹ Əngwar Bilatusu anə nda, “Hər nya mau hya nda məliya nyi numa ar kərhyi ənggəra dladər hyi nana.” Əngwar njir Yahudiya anə nyi, “Nji a'yi nə 'ya dənama nə thla numa nə tə anə ndə mai.”

³² Səkə dərkər aga ja nyabiya səra Yesu nana ar kəra culi tə kəra ju nda tau.

³³ Kə Bilatusu sha a vu pathla, kə ji ngga Yesu, ji yiwa nyi, “Dəm ya, nagə ngə təl nə njir Yahudiya ya?”

³⁴ Yesu şadəwa nyi, ji na, “Sara ara gau ngə ndər kə hya'ari ya, əndəga nji ngə ndər anə ngau ar kəra yi ya?”

³⁵ Əngwar Bilatusu anə nyi, “Ndər Yahudiya yi ya? A'yi nji gə hyi ənga pubu dədəgal'yar ngə shili ənga gə ənggə wa? Mi gə məliya?”

³⁶ Yesu şadəwa nyi, “Təlkur də, a'yi ənggər nə duniya mai. Maja abər təlkur də ənggər nə duniya, njir məl thlər də ndu pa ba nda kar njir Yahudiya

ara mbar da. Ama pakatəu, təlkur da sara ar vi pamə nga nyi.”

³⁷ Əngwar Bilatusu anə nyi, “Dəm ya, təl nga gə ya?” Kə Yesu shadəwa, ji na, “Kakalə nga nyi, ənggər kəra gə na, təl nga yau. Səra da nji yabiya da, ənga səra yi shili wu duniya aga nyi, aga ya nana səra jiri. Kalar ndəra wu yiwu jiri, ju sə himi səra yu na.”

³⁸ Bilatusu yiwa miya Yesu, ji na, “Mi ngə jira nya?” Kə Bilatusu bəra biya a biya əgya njir Yahudiya, ji biya na anə nda, “Nayi thləwa nyi ənga vazə mai.

³⁹ Ama a dəri sər cijir hyi aga ya səya hyi ndər fursəna pathlə wu lardur vəlna kau. Hyu yiwu ya səya hyi ‘Tələr njir Yahudiya’ ya?”

⁴⁰ Kə ndə bəra shadəwa nyi, ndu wau ndu na, “Awau, naja mai. Səya ‘ya Barabasu.” (Ama ja hya səni, Barabasu ndər dālagu ngau.)

19

Nji Thlana Nyi Numa Nə Tau Anə Yesu

(Matiwu 27:15-31; Markusu 15:6-20; Luka 23:13-25)

¹ Kə Bilatusu səwa nji nə nyi wuda anə Yesu.

² Kə soja'yar məliya dara shikədi nə təlkur ba ndə har nyi anə Yesu. Kə ndə har nyi ləgutə tuwara dəzəu kəra ənggər nə təlkur.

³ Ndə shili əgya ja, ar kər ar kər ndu na anə nyi, “Ənga barka ngau, ciwar, tələr njir Yahudiya!” Ba ndə nə nyi tsəbalma.

⁴ Kə Bilatusu bəra biya a biya əgya njir Yahudiya, ji biya na anə nda, “Kəja yu biya ənga ja, ara yu yiwu hya səni abər nayi thləwa nyi ənga vazə mai.”

⁵ Ænggæra Yesu biya ænga dara tælkur næ shikædi a dar kæra ja ænga lægutæ tuwara dæzæu, kæ Bilatusu na anæ nda, “Kæja nda nyi!”

⁶ Ta pubu dædægal'yar ænga njir bæla ki Hyal lari nyi, ba ndæ hya'ana dæhæu, ndu na, “Dlakæya nyi! Dlakæya nyi!” Ama kæ Bilatusu shadæwa nda, ji na, “Hær nya mau hya nda dlakæya nyi sær hyi, arya nayi lari bikæ nyi mai.”

⁷ Ængwar njir Yahudiya anæ nyi, “Dladær 'ya a'yi, kæra na a dær tsa'a nja dlakæya ndæ kau, ja tau, ara ji hær kærnyi ar viya Zær Hyal.”

⁸ Ænggæra Bilatusu nggar ndær kau, ba hivær nyi cakau.

⁹ Ba ji bæra sha a vu hudæ pathla, ji vuwa yiwa Yesu, ji na, “Sara mani nga gæ shila?” Ama Yesu a'yi shadæwa nyi mai.

¹⁰ Agabangau, ængwar Bilatusu anæ nyi, “Gæ nggæl ara ndær anæ dæ ya? A'yi gu sæni abær a'yi yi ænga dænama næ sæya ngau, ænga næ dlakæya ngæ wa?”

¹¹ Kæ Yesu shadæwa nyi, ji na, “Dænama kæra a'yi ara gæ ar kæra yau, dænama kæra Hyal nængæ ngæ wacu. Agabangau, ndæra fuwa dæ wu tsa gæ nga ndiya ngæ ænga bikau.”

¹² Ar kæra ndær kæ ngæ Bilatusu wu yiwu ja sæya Yesu, ama kæ njir Yahudiya hya'ana dæhæu ndu na, “Ma gæ sæya nyi ji ma'yi, nagæ a'yi bazhiya Kayisaru mai. Kalar ndæra wu yiwu ja mæliya kærnyi ar viya tæl, dawa Kayisaru nga ja.”

¹³ Ænggæra Bilatusu nggari ndær kau, ba ji hæbiya Yesu a biya, ji biya nggya ar sær nggya næ pathla ar vira nji pædlæya ænga tsæka. Kæra nju ngga ænga miya njir Yahudiya Gabathla.

¹⁴ Pəci kau, pəci ta'yi kər, pəci kəra nju fə sə wu lagu nju vu sugu nə lardur nə vəlbiya. Əngwar Bilatusu anə njir Yahudiya, “Kəja mə tələr hyi!”

¹⁵ Ama kə ndə hya'ana dəhəu ndu na, “Tsəya nyi! Tsəya nyi! Dlakəya nyi!”

Kə Bilatusu yiwa nda, ji na, “Ya dlakəya hyi tələr hyi ya?”

Kə pubu dədəgal'yar shadəwa, ndə na, “Vanyi təl a'yi ara 'ya mai, kəl təl Kayisaru.”

¹⁶ Agabangau, kə Bilatusu həri Yesu ji nər nyi anə njir Yahudiya aga nda dlakəya nyi.

Nji Dlakəya Yesu

Kə soja'yar ma'yi ənga Yesu.

¹⁷ Yesu biya sara wu huda məlmə ja vər hə wu dladlakə nyi a ndar vira nja ngga ənga vir pa-pangəkər. Ənga miya njir Yahudiya nju ngga viya nyi ənga Gwalgwathla.

¹⁸ Ar vi kə nga nji dlakəya Yesu, ənga nji məthləu, pathlə lagu mazəma ja, ənga vanyi ndə lagu mat-sala ja.

¹⁹ Bilatusu tsəfər sau, ba ji pathləri ar wu dladlakau. Kəja sərə ji tsəfəri, “Yesu ndər Nazəratu, Tələr njir Yahudiya.”

²⁰ Ara ji dlakəya Yesu ləhəu wu dzər məlmau, ba məliya njir Yahudiya gangəu jigana sərə nji tsəfəri kau. Sərə ji tsəfəri, ji tsəfəri wu miya njir Yahudiya, ənga miya njir Roma ba ənga miya njir Gərikəu.

²¹ Kə pubu dədəgal'yar nə njir Yahudiya nar nyi anə Bilatusu, “Ga sara tsəfə Tələr Njir Yahudiya mai, ama ga na, əngwar ndə kau, naja əngwa ngə Tələr njir Yahudiya.”

22 Əngwar Bilatusu anə nda, “Səra yi tsəfəri a tsəfər yau.”

23 Ayukuda soja'yar kə dlakəya Yesu, ba ndə fa'ari kar ha nyi, ndə təkəya bwata fodəu, kə kalar soja həri bwata pathləu. Ndə bəra həri ləgutə dzəgamə nyi kəra a'yi nji mbə mai, ama tsa nga nji tsa mbari a du kər ba'a a gyiwu ndəl.

24 Kə ndə na wu pama nda, “Məna sara ta ləgutə kə mai, ama məna tədə shi'wu a miya ndəla nyi məna lari ndəra wu səmku.” Sə'yar kə dərkər aga ja nyabiya səra tsətsəfau wu ləkakadə nə Hyal kəra na abər,

“Ndə təkəya kar ha də
wu pama nda,
ndə tədə shi'wu
ar kəra ləgutə ha də.”

Ya kəja səra soja'yar kə məliya ngau.

25 Tata'yi ləha dzər wu dladlakə nə Yesu, ca ngə mənyi ənga kwamə nyi ənga Maryamu mala Kəliyopasu ba Maryamu Magədaliya.

26 Ənggəra Yesu lari mənyi a ndəna ənga zəmbəlma kəra ju yiwu ta tata'yi ləha dzər nyi, kə ji na anə mənyi, “Ama, kəja zər ngau.”

27 Əngwar ja anə zəmbəlma kau, “Kəja mə ngau.” Ənggə ngə zəmbəlma kə hər nyi a ndu ki nyi.

Tər Yesu

28 Yesu, ayukuda ji sənbiya abər kalar sə a kudəri, aga səra tsətsəfau a nyabiya dzau, kə ji na, “Hili wu tə də.”

29 Ar pəci kau, bəlari a'yi əna kəra nyinyau ənga 'yimi mwamwalu. Kə ndə ciwa sasa'u a gwu 'yimi

mwamwala nyi, ba ndə ciri ar zəwa ba ndə fuwa a du miya Yesu.

³⁰ Ənggəra ji təwari, əngwar Yesu “A kudəri.” Ayukuda kə ba ji uzhiya kər, ba ji tau.

³¹ Pəci kau, pəcir fə sə wu lagu nə pəcir Bəlsar ngau, ənga əzəgəkura nyi tsu pəcir Bəlsar kəra pamə ara alenyi ngau. Agabangau, njir Yahudiya a'yi wu yiwu nda piyari dza nda a dar wu dladlakə ar pəci ta mai. Ba ndə yiwa Bilatusu aga ja piyari nda, nda bəbəlna hiya nda aga kusar tər nda, ba nda həya dza nda sara dar wu dladlakər nda, ba ji nə nda lagu.

³² Kə soja'yar shili ndə sa bəbəlna hiya ndə tanggərma kəra nji dlakəya ənga Yesu, ba ndə məliya nyi anə ndə nə məthləkura nyi tsu.

³³ Ama ənggəra ndə shili əgya Yesu, nandə bəbəlna hiya ja mai, ara divira nda shili a tər ja.

³⁴ Kə pathləu, wu pama soja'yar kə tsaviya Yesu ar thləpa ja ənga katsakər, ba mashi dəbə ənga 'yimi ndzəndzə sara a gwa.

³⁵ Ndəra səkə də wu liya ja, ngə lər sakida kau, sakida nyi jiri nga nyi. Naja ənga kərnyı wu səni abər sərə ju na, jiri nga nyi, ənga ji ləri sakida kau, aga nahyi tsu hya hənggəri.

³⁶ Sə'yar kə dərkər aga nyabiya sərə tsətsəfau wu ləkakadə Hyal, “Alaga dəhiya ja zəməu, nju bəlna mai.”

³⁷ Vanyi ndər Hyal kəra tsətsəfə na, “Ndə wu nda tsamə ndəra ndə tsaviya.”

*Hadə Dza Yesu
(Matiwu 27:57-61; Markusu 15:42-47; Luka 23:50-56)*

³⁸ A yukudɔ, kə Yusufu ndər Arimatiya naja ma zəmbəlma Yesu ngau, ama ar dɛwə, ara hivər njira nggurəm nə Yahudiya. Ji sa yiwa Bilatusu aga ja nə nyi dza Yesu, kə ji nə nyi.

³⁹ Yusufu ma'yi ənga Nikodimosu, ndəra sə a'yi shili əgya Yesu uvu'yi ta. Nikodimosu ma'yi ənga muru gwagwadau ənga alosu kəra sə kisə ar viya tsəla pathləu.

⁴⁰ Kə nanda kə məthlə kau, ma'yi ka nda həri, kə ndə pədiya dza Yesu wu sər hadə ndau, daɓə ənga sə kisə kau, ənggəra njir Yahudiya wu hadə ndau.

⁴¹ Ləha dzər vira nji dlakəya nyi ar kau, vanyi fa wu a'yi. Wu fa wu kau, hu mafəliyangə a'yi kəra nji gəra sə a'yi hadəna ndə a gwa.

⁴² Ta da pəcir fə sə wu lagu nə njir Yahudiya ngau, ba tsu huwa nyi ləhə nga nyi, ba ndə hadəna dza Yesu wu huwa nyi.

20

Yesu Hya'ari Sara Vir Tau

(Matiwu 28:1-10; Markusu 16:1-8; Luka 24:1-12)

¹ Kadə əmudlau, ma tsu vi dlədlərəu, ar pəci nə tanggərma nə sugu, kə Maryamu Magədaliya ma'yi a nda tsamə huwa nyi. Ma ji nda ba ji ləri kəja nja jahənar tsəka hadə miya huwa nyi.

² Kə ji sha ənga hwi a ndəgya Simanu Biturusu ənga vanyi zəmbəlma kəra Yesu wu yiwu ta. Kə ji na anə nda, “A hər nji dza Thlagə sara wu huwa nyi, kəja na'ya səni vira nji fiya nyi ari mai.”

³ Kə Biturusu ənga vanyi zəmbəlma ta biya ndə mbar lagu ndar huwa nyi.

⁴ Gyapə nda mbar hwi, ama kə vanyi zəmbəlma ta ndiya Biturusu ənga hwi a ndar huwa nyi.

⁵ Ji nda uzhiya dzau, ju tsamə gwu huwa nyi, ba ji lari kar hadə ndau a gwu huwa nyi, ama naji gwu huwa nyi mai.

⁶ Kə Simanu Biturusu ndəra a gyiwu yukudə nyi shili a miya huwa nyi, ba ji tərabiya a gwu huwa nyi, ba ji gwa lari kar hadə ndau a guna.

⁷ Kə ji bəra lari zhaḅi kəra nji mbuya bama Yesu əni a gwu huwa nyi pəpəḁau lagu batiti.

⁸ Kə zəmbəlma ta shili a miya huwa nyi a ndiya Biturusu ta ma'yi a gwu huwa nyi tsu. Ənggəra ji gwa lari ba ji hənggəri abər jiri nga nyi.

⁹ Ba'anə kabangəkə nanda a'yi nggabiya səra tsətsəfau wu ləkakadə abər kəl Yesu hya'ari sara vir tə mai.

*Yesu Canə Nyi Kənyi Anə Maryamu
(Matiwu 28:9-10; Markusu 16:9-10)*

¹⁰ Kə zəmbəlma'yar kə sha a ndu ki.

¹¹ Maryamu nə nyi ta'yi a miya huwa nyi ja vər tiwi. Tsu ja vər tiwi, ba ji uzhaus, ju tsamə gwu huwa huwa nyi.

¹² Maja vər tsamə, ba ji lari waladi'yar məthlə wu kar pərtə ngganggashiu ar vira nji pina dza Yesu ar ta. Waladi pathlə a vər nggya a dar vir kəra ja ənga vanyi tsu a gyar vir hiya ja.

¹³ Kə waladiya nyi'yar yiwa nyi ndə na, “Mala, mi ngə ḁa gwu tiwi ya?”

Əngwar ja, “A hənar nda Thlagə ḁa sara ənggau, ya, nayi wu səni vira ndə həna nyi a ndar mai.”

¹⁴ Ənggəra ji kudəna na abangau, ba ji shabiya dzau, ba ji lari Yesu ta'yi a ndəna, ama naji tsamə ri abər Yesu ngə mai.

¹⁵ Kə Yesu yiwa nyi, ji na, “Mala, mi ngə də gwu tiwi ya? Wa nga gu gala?”

Ma ju nggani abər ndər məl thlər wu fa wu ta ngau, əngwar ja anə nyi, “Maləmə, ma nagə ngə hər nyi sara ənggau, nar də vira gə fiya nyi ari, aga ya nda hər nyi.”

¹⁶ Kə Yesu ngga nyi, ji na, “Maryamu.” Ji shabiya dzə a ndara ja, ji na ənga miya njir Yahudiya, “Rabwani!” (Kəra ca ngə Maləmə.)

¹⁷ Əngwar Yesu anə nyi, “Ga sara mba də mai, ara tsu yi gəra sha a da ara Tada kwatahəu. Ama ga ma'yi a ndara zaməda'yar ga nda nar nda, sha nga yi a dara Dədə ənga Dərhyi, ba a dəgya Hyal də ənga Hyalər hyi.”

¹⁸ Kə Maryamu Magədaliya ma'yi, ji nda nar nyi anə zəmbəlma nyi'yar, “A lar yi Thlagəu!” Kə ji nar nda sərə Yesu nar nyi.

Yesu Canə Nyi Kəny

Anə Zəmbəlma Nyi'yar

(Matiwu 28:16-20; Markusu 16:14-18; Luka 24:36-49)

¹⁹ Əwagəu pəci tanggərma nə sugu, ar pəci kəra zəmbəlma 'yar nə Yesu kaəau ar vi zəməu. Ndə hədiya miya ki ara hivər njira nggurəm nə Yahudiya. Ma tsu nda a vuna, kəja Yesu ta'yu wu hada nda, ji na, “Jaməkur ja nggya ənga hyi.”

²⁰ Ayukuda ji nana ndər kau, kə ji canə nda tsa ja ənga thlərpa ja. Kə zəmbəlma nyi'yar nyabiya dzə ənga hüdə pipida ara ndə lari Thlagəu.

²¹ Kə Yesu bəra na anə nda, “Jaməkur ja nggya ənga hyi! Ənggər kəra Tada səwa də, abangau ənga yu sə hyi.”

²² Ənggəra ji nana abangau, ba ji səna pi a nda gəra nda, ji na, “Dləwara mau Mambəl Cicau.

²³ Kalar ndəra hyi təfəbiya nyi bikə nyi a təfəbiya nyir nji bikə nyi, abangə tsu, kalar ndəra hyi nggəl ara təfəbiya nyi bikə nyi a nggyari abangau.”

Yesu Canə Nyi Kəryi Anə Toma

²⁴ Toma (ndəra nju ngga ənga bili), pathlə wu pama nda kumo apə məthləu, a'yi ja ma Yesu shili ara zəmbəlma nyi'yar mai.

²⁵ Kə alenyi zəmbəlma'yar kə na anə nyi, “A lar 'ya Thlagəu!”

Ama əngwar Toma anə nda, “Ma nayi a'yi lari məcavədi nə kusa ar tsa ja mai, ənga yi fuwa tsa yi a vu vira kusa ar ta mai, ənga yi fuwa tsa yi a vu thləpa ja mai, nayi wu hənggəri əni mai.”

²⁶ Ayukuda sugu pathlə ətsu, zəmbəlma nyi'yar bəra tsəmiya dzə wu ki, ar pəci kə Toma a'yi ja əkkə'yi nda. Miya ki dədəl nga nyi, ama kə Yesu shili ji sa ta'yi wu pama nda ji na, “Jaməkur ja nggya ənga hyi.”

²⁷ Kə ji na anə Toma, “Fər ku'yir tsa gə ənggau, ga tsamiya tsa yau. Hər tsa gau ga fiya a vu thləpa yau. Piyari təkəkər ga də ndəra ənga mbərsa.”

²⁸ Əngwar Toma anə nyi, “Thlagə də ənga Hyal də!”

²⁹ Yesu shadəwa nyi, “Ara gə lar də nga gə hənggəri ya? Njir barka ngə njira gəra lar də ama kə ndə hənggəri ənga yau.”

Səra Da Yahwana Tsəfəri Tsəfə Kau

³⁰ Yesu məliya sə dədəgur'yar paməpamə gangəu wu liya zəmbəlma nyi'yar, kəra nji a'yi tsəfəri wu ləkakadə kə mai.

³¹ Ama nji tsəfəri najakau, aga hya hənggəri abər Yesu ngə Kərsiti, Zər Hyal, ənga tsu aga ja də lagur mbərsa ba hya uya pi lagur thləmə nyi.

21

*Yesu Canə Nyi Kəryi**Anə Zəmbəlma Nyi'yar Mədəfau*

¹ Ayukuda sə'yar kau, kə Yesu bəra canə nyi kər anə zəmbəlma nyi'yar ar miya dəl Tiberiyasu. Kəja ənggəra ji dərkər.

² Simanu Biturusu ənga Toma (ndəra nju ngga ənga bili) ənga Nathlaniyalu sara wu məlmə Kana wu Galili ənga wazha Zabadi ənga alenyi zəmbəlma məthlə ngə a ndəna.

³ Əngwar Biturusu anə nda, “Ma'yi nga ya nda təm.” Əngwar alenyi nji kau, “Na'ya ma'yi wu ma'yi ənga gau.” Kə ndə biya ndə biya gwu kwambwal ba ndə ma'yi. Ama pəci ta vu'yi sə a'yi ndə mbar mai.

⁴ Kadə mudlə ənggəra vi kudəu, kəja Yesu ta'yi a miya dəl, ama zəmbəlma nyi'yar tsamə ri abər naja ngə mai.

⁵ Kə Yesu na anə nda, “Bazhi də'yar, a'yi hyi ənga kalfi wa?” Əngwar nda anə nyi, “Awau.”

⁶ Kə Yesu na anə nda, “Vakuwa mə litagər hyi a ndar lagu mazəma kwambwal kau, ba hya uya nda.” Ta ndə məliya ənggəra ji na, ba ndə mbar

kalfi gangə gagadau, kəra da dzadzau anə nda, nda tədəbiya a du kwambwala nyi.

⁷ Kə zəmbəlma ta Yesu wu yiwu ta na anə Biturusu, “Thlagə ngau!” Ənggəra Simanu Biturusu nggari ndər kau, abər, “Thlagə ngau,” kə ji həri ləgutə nyi ji hari ara dədəməu tursə nga ja. Kə ji dzəgwa vəl a gwu 'yimiya nyi.

⁸ Alenyi zəmbəlma nyi'yar ma'yi a ndar dza dəl a gwu kwambwalər nda, nda a vər tətədə litagər nda nyinyau ənga kalfi. Ar pəci ta nanda a'yi nədə sara miya dəl mai. Pama nda wu da ənggər hyi gharu makəru.

⁹ Ənggəra ndə biya a miya dəl, ba ndə thləwa əvunyi mbəmbə ənga u'u ənga kalfi a dari ba ənga macikəl tsu.

¹⁰ Əngwar Yesu anə nda, “Gəri a mau kalfi kəra hyi mbari a shili ənggau.”

¹¹ Kə Simanu Biturusu ma'yi a dar kwambwal, ju tədə litagəu a biya miya dəl. Litagə kə nyinyi nga nyi ənga kalfi nggunggurəm gharu ənga təfu kumunyi apə makəru. Ama alaga kə litaga nyi nyinyi ənga kalfi, a'yi tanakər mai.

¹² Kə Yesu na anə nda, “Shili a mau hya sa səm sər səm nə mudlau.” Wu pama zəmbəlma nyi'yar ndə a'yi kəra cinapi ji yiwa nyi, ji na, abər, “Wa nga ga” mai, ara ndu səni abər Thlagə ngau.

¹³ Ba Yesu hya'ari ji həri macikəla nyi, ba ji nə nda ənga kalfiya nyi tsu.

¹⁴ Najakə ngə nə makərkura nyi, ənggəra Yesu canə kər anə zəmbəlma nyi'yar ayukuda ji hya'ari sara vir tau.

Yesu Shabiya Biturusu A Shili

¹⁵ Ənggəra ndə kudəna səm sər səm nə mudlau, kə Yesu nar nyi anə Simanu Biturusu, “Simanu zər Yahwana, ənga jiri nga gu yiwu də a ndiya sə'yar kə ya?”

Kə Biturusu shadəwa nyi, ji na, “Angə, Thlagəu, gu səni yu yiwu ngau.”

Əngwar Yesu anə nyi, “Səməna wazha təmahə də'yar kau.”

¹⁶ Kə Yesu bəra na anə nyi, “Simanu zər Yahwana, ənga jiri nga gu yiwu də ya?”

Kə ji shadəwa, ji na, “Angə, Thlagəu, gu səni abər yu yiwu ngau.”

Əngwar Yesu anə nyi, “Bəla təmahə də'yar.”

¹⁷ Yesu bəra na anə nyi nə makərkura nyi, “Simanu zər Yahwana, gu yiwu də ya?”

Ba sə kə ndzana huđa Biturusu arya Yesu yiwa nyi ar kər ar kər makəru, “Ənga jiri gu yiwu də ya?”

Əngwar ja anə nyi, “Thlagəu, gu sən sə patəu. Gu səni abər yu yiwu ngau.”

Əngwar Yesu anə nyi, “Səməna təmahə də'yar.

¹⁸ Jiri nga yu na anə ngau, pəci kəra gə tsu zər, nəgə ngu ha kar anə kərngau, ba ga ma'yi a ndar vira gu yiwu. Ama ma gə nda hal, gu nda ha tsi anə nji aga nda har nəgə kar ba nda dzəgwa hər ngau a ndar vira gə gəra yiwu.”

¹⁹ Yesu nana abəngau aga cabiya culi tə kəra Biturusu wu nda tau, kəra wu dla ənga kadakadarkur anə Hyal. Kə ji na anə nyi, “Nu də.”

²⁰ Biturusu shabiya dzə ji tsamə gyiwu yukudə, ba ji lari zəmbəlma ta Yesu wu yiwu ta a vər nu nda. Najakə nəgə zəmbəlma ta təghər dzə ar dza Yesu pəci kəra nda a vər səm sər səm nə lardur nə vəlma ənga

ji na anə Yesu, “Thlagəu, wa ngu nda thləna hiya ga?”

²¹ Ənggəra Biturusu lari nyi, kə ji yiwa Yesu, ji na, “Thlagəu, kar ndə kə tsu, mi ngə nə nya?”

²² Kə Yesu shadəwa nyi, “Ma yu yiwu ja da a'yi ənga pi kəl yi sha shili, mi ngə dzau nga? Nagə, kəl ga nu da?”

²³ Agabangau, kə ndər kə tətəlnakər wu pama njir nu Yesu, abər zəmbəlma kə wu tə mai. Ama Yesu a'yi na abangə mai. Səra ji na ca ngə, “Ma yu yiwu ja nggya ənga pi kəl yi shili, mi ngə dzau nga?”

²⁴ Najakə ngə zəmbəlma kəra ləri sakida ar kəra sə'yar kə patəu, ənga ji tsəfər nda. Mən wu səni abər sakida nyi jiri nga nyi.

²⁵ Ama alenyi sə paməpamə gangə a'yi kəra Yesu məlna. Maja abər nji tsəfəri patər səra ji məlna, duniya ənga kərny i a sən həri ləkakada nyi mai.

Ndəshigu'yar Fodəu Ənga Thlər Cama'yar
The New Testament in the Marghi South language of
Nigeria: Ndəshigu'yar Fodəu Ənga Thlər Cama'yar

copyright © 2024 The Seed Company

Language: (Marghi South)

Contributor: Initiative for the Translation and Development of African Languages

This translation is made available to you under the terms of the Creative Commons Attribution Share-Alike license 4.0.

You have permission to share and redistribute this Bible translation in any format and to make reasonable revisions and adaptations of this translation, provided that:

You include the above copyright and source information.

If you make any changes to the text, you must indicate that you did so in a way that makes it clear that the original licensor is not necessarily endorsing your changes.

If you redistribute this text, you must distribute your contributions under the same license as the original.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

Note that in addition to the rules above, revising and adapting God's Word involves a great responsibility to be true to God's Word. See Revelation 22:18-19.

2025-05-13

PDF generated using Haiola and XeLaTeX on 13 May 2025 from source files dated 13 May 2025

63471087-0de7-5f4b-aa1f-ca2e66571a95